

JESUCRISTOMANDA ALI SHIMI JUAN CUENTASHCA

Causaj Shimi aicha tucun

1:1 Callari tiempoi Rimashca Shimi nishca tiaj aca. Cai Rimashca Shimi Dioshua parijsu tiaj aca. Cai Rimashca Shimi Dios aca. 2 Callari tiempoi Dioshua parijsu tiaj aca. 3 Tucui rashcauna pai rashcami aca. Pai illaj mana imas rashcachu aca. 4 Paihuajpi causai tiaca. Cai causaiga runaunara punzhayachina aca. 5 Cai punzhayachina llandu tutara punzhayachin, astaun llanduga punzhayachinara mana llanducachu. 6 Shu Dios cachamushca runa, Juan nishca, tiauca. 7 Cai Juanga shamuca cai punzhayachinara ricsichingaj, pai rimashcamanda tucui runauna quirinauchu. 8 Juan mana cai punzhayachinachu aca, astaun cai punzhayachinara ricsichingaj shamucami. 9 Chi cierto punzhayachina, tucui runaunara punzhayachij, cai pachama shamuca. 10 Paiga cai pachai tiaca. Cai pacha pai rashcami aca. Astaun cai pacha paita mana ricsicachu. 11 Paihuajma shamuca, randi paihuajguna mana paita chasquinaucachu. 12 Astaumbas tucui paita chasquiijgunara ushaira cuca Diospa churiuna tucungaj, maicans paihua shutii quirisha. 13 Caiguna mana yahuarmanda, mana runa aichamandas, mana runa munaimandas ñachishca anaun. Astaun Diospa munaimandalla ñachishca anaunmi. 14 Cai Rimashca Shimiga runa tucuca, ñucanchihua parijsu causaca. Paihua sumajta ricucanchi, Yaya Diospa sapalla churi sumaj cuenta. Paiga gracia nishca ali iyaihua undashca aca; ima llullanas illaca paihua. 15 Juan paimanda rimasha, caparisha nica: Caimi ñuca rimaushca runa, ñuca huashai shamuj ñucamanda yalimi, nisha, pai ñucamanda ñaupashcaraigu. 16 Pai ashcara charishcamanda tucui ñucanchi apishcanchi, maspas paihua mana tucurihuaj gracia nishca ali iyairas. 17 Ley camachishca shimi Moisesmanda rimashca aca, randi gracia nishca ali iyai cierto shimis Jesucristomanda shamunauca. 18 Pihuas imahoras Diosta mana ricushcachu. Paihua sapalla Churilla, Yayahua parijsu tiaj, paila Diosta ricsichicami.

Bautisaj Juan riman

19 Caitaga Juan rimashcami, imahoras judioguna Jerusalen llactamanda sacerdoteunara Levitas nishcaunandi cachanauca paita tapungaj: ¿Pitanguiri can? nisha. 20 Paiga rimaca, mana umachicachu, astaun ciertora rimaca: Ñucaga mana Cristochu ani, nisha. 21 Paitaga tapunauca: Shinajpiga, ¿Imarai? ¿Elíaschu angui? nisha. Paiga: Mana, nica. ¿Diosmanda rimajehu angui? ninauca. Paiga cutipaca: Mana. 22 Paita ninauca: Shinasha ¿pitanguiri? Cuentahuai, ñucanchira cachamujgunara cutipangaj. ¿Imara ningui can quiquinmanda? 23 Juan nica: Ñuca runa illashca partimanda caparij shimi ani: Señorba nambira dirichuyachichi, nisha, Diosmanda rimaj Isaías rimashcasna. 24 Cai cachamushca runauna fariseogunamanda anauca. 25 Shinajpi Juanda tapunauca: ¿Imarasha bautisangui, nisha, can mana Cristo a sha, mana Elíaspas, mana Diosmanda rimaj ashas? 26 Juan paigunara

cutipasha nica: Ñucaga yacui bautisani; randi, canguna chaupi shungüi shu canguna mana ricsishca runa tiaun. 27 Caimi ñuca huashai shamuj. Paiga ñucamanda yalimi. Paihua zapatos huascara pascanallas mana valijehu ani. 28 Caiguna Betabara nishca llactai tucuca, Jordán yacu chimbara, Juan bautisaushcai.

Diospa Borrego

29 Cayandi punzha Juan Jesusta paihuajma shamuuta ricuca. Pai Jesusta ricusha: Caiga, nica, Diospa Borrego, cai pacha uchara llushpichij. 30 Caimi ñuca rimaushca runa: Ñuca huashai shamuj, paiga ñucamanda yalimi, pai ñucamanda ñaupashcaraigu, nisha. 31 Paita mana ricsicanichu; astaun Israelma paita ricsichingaj, ñuca yacui bautisasha shamucani. 32 Shinallara Juan nica: Espiritura urpisna ahua pachamanda irgumujta ricucani; paihua ahuai tiauca. 33 Ñucaga paita mana ricsicanichu; randi, ñucara yacui bautisangaj cachamuj, paiga ñucara nihuaca: Maicamba ahuai Espíritu urmashcara ricungui, paiga Santo Espirituhua bautisajmi. 34 Paita ricucani. Ciertora rimashcani: Caimi Diospa Churi, nisha.

Ñaupapunda yachachishca runauna

35 Cayandi punzha, Juan cuti chihui tiauca, ishqui pai yachachishca runaunandi. 36 Juan Jesusta chihui puriuta ricusha: Caiga Diospa Borregomi, nica. 37 Chi ishqui yachachishca runauna pai rimashcara uyanauca; Jesusta catinauca. 38 Jesús voltiarisha, paita catijunara ricuca. ¿Imara mascanguichi? nica. Paiguna cutipasha ninauca: Rabí, (caita runa shimii, Yachachij nin) ¿maibira causaungui? 39 Jesús: Ricuj shamichi, nica. Paiguna rishaga, pai tiaushcara ricunauca. Las cuatro mayan tucujpi paihua parijsaquirinauca chi punzhai. 40 Cai ishqui Juan rimashcara uyajguna, Jesusta catimujguna, cai ishquimanda shuj Andrés maca, Simón Pedro uqui. 41 Paiga paihua uqui Simonda ñaupapunda tupasha, paita nica: Mesías nishcara tupashcanchi; caita runa shimii Cristo nin. 42 Andrés paihua uqui Simónanda Jesusma pushamuca. Jesús paita ricusha: Can Simón angui, Jonaspa churi, nica, canda Cefas shutichishca angui; caita Pedro nin.

Jesús Felipera Natanaeldas cayaun

43 Cayandi punzha Jesús Galilea partima risha nica. Paiga Felipera tupasha, paita nica: Nucahua catihau. 44 Felipe Betsaida llactamanda runa aca. Shinallara chi llacta Andrés Pedros causaushca llacta aca. 45 Felipe Natanaelda tupaca; paita nica: Moisés pai camachishca shimii quillcaushca ruñara tupashcanchi. Diosmanda rimajguna shinallara paimanda quillcanauca. Paimi Nazaretmanda Jesús, José churi. 46 Natanael nica: ¿Nazaretmanda ima alira shamunara ushangachui? Felipe cutipaca: Ricuj shami, nisha. 47 Jesús Natanael paima shamushcara ricusha, Natanaelmanda rimasha nica: Cai runa cierto Israel runami, pai mana umachijchu. 48 Natanael paita nica: ¿Maimanda ricsihuanguichu ñucara? Jesús cutipasha: Felipe canda manara

cayajllaira, can higo yura ucui shayaushcai, canda ricucani, nica. 49 Natanael cutipasha rimaca: Rabí, Yachachij, nisha, can Diospa Churi angui, can Israel Rey apu mangui. 50 Cutipasha, Jesús paita nica: ¿Ñuca canda higo yura ucui ricucani nishcamanda quiriungui? Caigunamanda yaliunara ricunguimi. 51 Jesús nica: Ciertopacha cangunara nini: Caimanda huasha ahua pacha pascashcara ricunguichi; Diospa angelguna Runa Churi ahuai sicasha irgusha rajgunara ricunguichimi.

Borara raun Caná llactai

2:1 Quinsa punzha tucunahua, borara ranauca Caná llactai. Caná Galilea partii tiaca. Jesuspa mama chi borai tiauca. 2 Jesús pai yachachishca runaunandi borama convirashca anaUCA. 3 Borai, vino pishijpi, Jesuspa mama paita nica: Vino illan. 4 Jesús paita nica: ¿Huarmi, imarasha casna rimahuangui? Ñuca horas chara mana pactamunzhu. 5 Paihua mama sirvijgunama nica: Tucui pai ima rimashcaras rangui. 6 Chihui socta atun rumi quisauna tianaUCA, judioguna armana yachai tono, caran quisa quinsa manga tupu aca. 7 Jesús paigunara nica: Quisaunara undachichi yacuhua. Shinajpi undajta undachinaUCA. 8 Shinajpi paigunara nica: Llucchichi cuna; borayuj dueñoma apaichi. Apanaucami. 9 Cai yacumanda rashca vinora camashca huasha, borayuj dueño maimanda apamushcara mana yachasha, randi yacura llucchij sirvijguna yachanaucami, pai carira cayaca. 10 Carira nica: Tucui runa ñaupapunda ali vinora upichin; pactajta upishca huasha yanga vinora cun; randi can ali vinora cunagama huacachishcangui. 11 Cai ñaupapunda munanaita ricurinara Jesús Galileai tiaj Caná llactai rarcami, paihua sumajta ricuchisha. Pai yachachishca runauna paihuajpi quirinaUCA. 12 Caimanda huasha Capernaúm nishca llactama irgunaUCA, paihua pariju paihua mama, paihua uquiuna, pai yachachishca runaunandi. Mana ashca punzhauna chihui tianaucachu.

Catujgunara ichun templomanda

13 Judioguna Pascua ista mayanllayaUCA. Jesús Jerusalenma sicaca. 14 Templo huasii huagrara borregora urpira catujgunara tupaca; shinallara cullquira turcajguna chihui tiajtas tupaca. 15 Jesusga huascaunara ahuaSHA azutinara rarcami. Tucui chigunara templomanda ichuca, borregounandi, huagraunandi. Shinallara turcajguna cullquira allpama talica, paiguna mesaunaras voltiachica. 16 Urripa catujgunara nica: Llucchichi cai tucuir. Ñuca Yaya huasira ama catuna huasira raichichu. 17 Shinajpi pai yachachishca runauna ñaupap horas quillcashcara iyarinaUCA, imasna nin: Camba huasira llaquina tucuchihuanmi. 18 Judiogunaga paita cutipanaUCA, nisha: ¿Ima munanaita ricurinara ricuchihuanguichu cai tucuir rashcamanda? 19 Jesús cutipasha nica: Cai templora tulaichi, ñucaga quinsa punzhai cuti shayachishami. 20 Judioguna caita uyasha ninaUCA: Chuscu chungasocta huatara tarabasha cai templora shayachishca aca, canga ¿quina punzhallaichu shayachingui? 21 Jesusga, templo nisha, paihua quiquin aichamanda rimaca. 22 Shinasha, pai huañushcaunamanda causarimushcai, pai yachachishca runauna cai rimashcara iyarinaUCA. Dios

quillcashcara quirinaucami, shinallara Jesús rimashca shimira quirinauca. Ashcauna Jesuspi quirinaun 23 Jesús Jerusalembi tiausha, Pascua ista punzhaunai, ashca runauna Jesuspa shutii quirinauca, pai munanaita ricurinaunara ricusha. 24 Jesusga paulara paiguna maquii saquinara mana munacachu, tucui runaunara ricsij asha. 25 Runaunamanda pihuas rimanara mana ministicachu. Paiga tucui runa shungüi charishcara yachaca.

Nicodemo Jesusma shamun

3:1 Shu Nicodemo nishca fariseo runa tiaca; judioguna atun apu maca. 2 Nicodemo Jesusma tuta shamuca: Rabí, Yachachij, nica, can Diosmanda shamushca yachachij ajta ricsinchi. Manapihuas can rashcasna munanaita ricurinaunara rangaj ushanma Dios mana paihua tiajpi. 3 Jesús cutipasha paita nica: Cierto pacha canda nini: Maicambas mana cuti pagarisha, Dios mandana pachara ricunara mana ushangachu. 4 Nicodemo nica: Runaga ¿imasna rasha cuti pagaringachu rucu asha? ¿Paiga mama icsai cuti icunara ushangachu pagaringaj? 5 Jesús cutipaca: Cierto pacha canda nini, maicans yacumandas Espiritumandas mana pagarisha, Dios mandana pachai icunara mana ushangachu. 6 Aichamanda pagarij aichami; Espiritumandas pagarij espiritumi. 7 Ama manzharichu ñuca canda nisha: Cutillara pagarina anguichi. 8 Huaira maimandas huairamun, pai tulupushcara uyarin. Astaun huaira maimandas shamun, maimas rin, can mana yachanguichu. Shinallarami tucui Espiritumanda pagarishcauna. 9 Nicodemo paita cutipasha: ¿Imasna rasha casna tucungai? nica. 10 Jesús paita nica: ¿Can Israel Yachachij Apu ashallarachu, caita mana yachanguí? 11 Cierto pacha, canda nini, ñucanchi yachashcara rimanchi, ñucanchi ricushcaras ricuchinchi; cangunaga ñucanchi rimashcaunara mana chasquinguichi. 12 Canguna ñuca cai pachamanda cuentashcaunara mana quirisha, ¿imasna rashara ñuca ahua pachamanda cuentashcaunara quiringuichi? 13 Pihuas ahua pachama mana sicacachu, astaun ahua pachamanda irgumujlla; pai ahua pachai tiaj Runa Churimi. 14 Imasna Moisés chaquishca allpa partii machacuirá atarichica caspi ahuai, shinallara Runa Churi atarichishca anga, 15 tucui maicambas paihuajpi quirisha ama chingarichu, astaumbas huiñai causaira charichu. 16 Casnami Dios cai pachara llaquica, paihua sapalla Churira cuca, maicans paihuajpi quirisha ama chingarichu, astaumbas huiñai causaira charichu. 17 Diosga paihua Churira mana cachamucachu cai pachara causayachingaj, astaun paimanda cai pachara quishpichingaj. 18 Maicans paihuajpi quirijsa mana causayachishcachu, astaun maicans mana quirijsa ña causayachishcami, Diospa sapalla Churi shutii mana quirishcamanda. 19 Caimi causayana: Punzha cai pachama shamuca, runaunaga punzhamanda yali tutara llaquinauca, paiguna rashcauna manali ashcamanda. 20 Tucui manalira rajguna punzhara chijninaun, punzhama mana shamunaun, paiguna rashcaunai ama piñai tucungaj. 21 Alira rajga punzhama shamun pai rashcauna Dios rashcaunami ricuchingaj.

Yacui bautisanaun

22 Chi huasha, Jesús pai yachachishca runaunandi Judea partima shamuca. Paigunahua chihui tiaushcai bautisacami. 23 Juan shinallara Enon llactai bautisauca, Salim llacta mayambi, ashca yacu chihui tiashcamanda. Shamujguna bautisashca anauca. 24 Juan chonda cularbi chara mana ishcashcachu aca. 25 Juan yachachishca runauna judiogunahua rimananauca paiguna aichara maillana yachaimanda rimasha. 26 Juanma shamunauca: Rabí, Yachachij, nisha, Jordán chimbai canhua tiaushca runa, can rimaushca, shinallara bautisaunmi; tucui paihuajma shamunaun. 27 Juan cutipaca: Runa mana imaras apiñara ushanzhu mana paima cushca ajpi ahua pachamanda. 28 Cangunallara ñuca rimashcara uyajguna anguichi, ñuca rimashcasna: Ñucaga mana Cristochu ani, astaun paimanda ñaupaca cachamushca ani, nisha. 29 Huarmira charijga carimi; randi cari amigo, paihua pariju shayarij, paihua shimira uyasha, ashcara cushiyan cari shimira uyashcamanda. Shinami ñuca cushi pactarin. 30 Pai yaparinara ministirin, ñucaga pishiyanara.

Ahua pachamanda shamuj

31 Ahuamanda shamuj tucui mandanda yalimi. Cai pachamanda ajga cai pachamandallami, cai pachamanda shimiunaras riman. Ahua pachamanda shamuj tucui mandanda yalimi. 32 Imara ricushas uyashas, caillara riman. Mana pihuasga pai rimashcara chasquinzhu. 33 Maicans pai rimashcara chasquisha, paiga Dios cierto rimaj ashcara ricuchin. 34 Dios cachamushca Runa Dios rimashca shimiunara riman. Dios mana tupusha Espiritura cunzhu. 35 Yaya Churira llaquin; tucuirapa paihua maquii entregashcami. 36 Maicans Churu quirisha huiñai causaira charin. Maicans Churira mana casusha, causaira mana ricungachu, randi Dios piñarishca paihua ahuai tianmi.

Samariamanda huarmi

4:1 Fariseoguna Jesús Juanmanda yali runaunara yachachiun bautisaun nishcara uyanauca. 2 Randi Jesús mana bautisacachu, astaun pai yachachishca runauna bautisajguna anauca. 3 Jesusga fariseoguna cai shimira uyashcara yachasha, Judea partimanda llucshisha, cutillara Galilea partima rica. 4 Ministiricami Samaría partirá pasangaj. 5 Shinajpi Jesús shu Samaría partii tiaj Sicar nishca llactama pactamuca. Cai llacta Jacob paihua churi Josema cushca allpa mayambi tiauca. 6 Jacobpa yacu bujyu chihui tiaca. Shinajpi Jesús nambira purisha, sambayashca asha, yacu bujyu rayai tiarica. Doce horas tupu aca. 7 Shu Samariamanda huarmi yacura apingaj shamuca. Jesús paita nica: Yacura upichihuai. 8 Yachachishca runauna micunara randingaj llactama rinaushca aca. 9 Samariamanda huarmi Jesusta nica: ¿Imarasha can judio runa asha ñucara upina yacura mañanguí, ñuca Samaría huarmi asha? Judioguna Samaría runaunahua mana llutarinaun. 10 Jesús cutipaca: Can Dios cuyashcara ricsishaga, canda, Upichihuai nisha rimajtas ricsishaga, can paita mañanguima, paiga causana yacura canda cunma. 11 Huarmi nica: Señor, imaras mana charingui yacura llucchingaj; yacu uctu yapa ucumi. ¿Maimanda cai causana yacura charinguichu? 12 Ñucanchi Jacob yaya cai yacu uctura cuyahuaca. Cai yacu

uctumanda pai upiuca churiunandi animalgunandi. Canga ¿paimanda yalichu angui? 13 Jesús cutipaca: Maicans cai yacura upishaga cutillara upinaichingami. 14 Randi maicans ñuca cushca yacura upisha, huiñaigama mana cuti upinaichingachu. Ñuca cushca yacuga paihua shungu ucui yacu bujyu cuenta pahuangami huiñai causaira cungaj. 15 Huarmi paita nica: Señor, cai yacura cuhuai, ñuca ama upinaichingaj, ama caima llucchij shamungaj. 16 Jesús nica: Carira cayai risha, caima shamichi. 17 Huarmi cutipasha nica: Cari illaj ani. Jesusga nica: Ciertomi ningui, Cari illaj mani. 18 Pichca carira charishcangui; can cuna chariushca mana quiquin carichu. Shina nisha, ciertomi rimashcangui. 19 Huarmiga: Señor, nica, can Diosmanda rimaj angui, yachin. 20 Ñucanchi yayauna cai urcui Diosta alabanauca. Randi canguna ninguichi Jerusalenlai Diosta alabanami, nisha. 21 Jesús paita nica: Huarmi, quirihuai, nisha, horas pactaringami mana cai urcuis, mana Jerusalembis Yayara alabanguichi. 22 Canguna mana ricsishcara adoranguichi; randi ñucanchi ricsishcallara adoranchi. Quishpinaga judiogunamanda shamun. 23 Horas shamun, cunallara pactamun, imahoras cierto adorajguna Yayara almai cierto adoranaungami. Shinallara Yaya casna adorajgunara mascanmi paita adorangaj. 24 Diosga Espiritumi. Paita adorajguna almai cierto adorangaj ministirinmi. 25 Huarmiga: Ñuca yachaniami, nica, Mesías nishca shamuna angami, pai Cristo nishca shutichishcami. Pai shamujpiga tucuir a yachachinga ñucanchira. 26 Jesús paita nica: Ñuca canhua rimau, Cristo mani. 27 Chi ratollaira pai yachachishca runauna shamunauca. Jesús cai huarmihua rimaushcamanda manzharinauca, astaun mana pihuas paita tapucachu: ¿Imara tapungui? nisha, ¿imara paihua rimangui? 28 Shinajpi huarmi paihua quisara saquisha, llactama rica; llactai tiaj runaunara rimaca. 29 Ricuj shamichi, nica, shu ruñara. Pai ñuca tucui rashcaunara rimahuashcami. ¿Manzhu cai Cristo angái? 30 Shinajpi llactamanda llucshimusha, runauna Jesusma shamunauca. 31 Yachachishca runaunaga Jesusta: Yachachij, micui, nisha ruganauca. 32 Paiga cutipaca: Ñuca shu canguna mana yachashca micunara charini micungaj. 33 Shinajpi yachachishca runauna paigunapura ninauca: ¿Maicans paihuaajta ima micunara apamushca angai? 34 Jesús paigunara nica: Ñucara cachamuj Dios munashcara rangaj, caitami ñuca micuna, paihua ranaunara pactachingaj. 35 ¿Manzhu ninguichi: Chara chuscu quilla pishin pallanagama? Cangunara nini: Ñahuir a atarichichi, chagraunara ricuichi. Tucui ña chaquirishcami pallangaj. 36 Pallajga paihua pagara apin, muyuunara huiñai causaihuaajta pallan. Shinasha tarpujpas pallajpas pari ju cushiyanaun. 37 Casnamanda cierto rimashcami: Shujmi tarpun, shuj randi pallan. 38 Canguna mana tarpushcara pallangaj cachamucani. Shujguna tarabanauca, cangunaga paiguna tarabashcamanda valiricanguichi. 39 Ashca chi llactamanda Samaría runauna Jesuspi quirinauca chi huarmi rimashcamanda, pai nishcamanda: Paiga tucui ñuca rashcaunara cuentahuaca, nisha. 40 Samaría runauna Jesusma shamushaga, paita ruganauca, Ñucanchihua saquiri, nisha. Jesús ishqui punzha tupura paigunahua saquirica. 41 Ashca runauna maspas quirinauca, Jesús rimashcamanda. 42 Paiguna ninauca huarmira: Ña quirinchimi, mana can rimashcamandalla, astaun ñucanchillara paita uyashcanchi. Shinasha pai cierto pacha Cristo nishca, cai pachara Quishpichij ashcara ricsinchi.

Valij runa churira alichin

43 Ishqui punzha huasha, Jesús chi llactamanda llucshisha, Galilea partima rica. 44 Jesusllara nica: Diosmanda rimaj paihua quiquin llactai mana chasqui tucunzhu. 45 Jesús Galileama shamujpiga, chihui causajguna paita chasquinauca, tucui pai ista punzha rashcaunara ricushcamanda Jerusalem. Paigunas isíama rinaushca aca. 46 Shinajpi Jesús cuti Galileai tiaj Caná nishca llactama shamuca, maibi ñaupá vinora yacumanda rarcami. Capernaum llactai, shu reyhua capitán tiaca; paihua churi unguishca aca. 47 Caiga, Jesús Judeamanda Galileama shamushcara uyasha, Jesuspajma rica. Paiga Jesusta ringaj rugaca, churira alichingaj, ña huañungaraupi. 48 Shinajpi Jesús paita nica: Canguna atun ricurinaunara munanaita ranaunaras mana ricusha, mana quiringuichi. 49 Rey apuhua capitanga Jesusta nica: Señor, ñuca churi manara huañujllaira, uctalla irgusha shamupai. 50 Jesús cutipaca: Ri, nisha, cambia churi causaun. Runaga Jesús rimashcara quirisha ricami. 51 Irgushca huasha, sirvijguna paita tupangaj llucshinauca. Paita rimanauca: Camba churi causaunmi, nisha. 52 Shinajpi capitán tapuca: ¿Imahorasta aliyangaj callarica? Caina, la una tupura, calentura chiriyaca, ninauca. 53 Yaya shinajpi intindica huahua aliyashca horas Jesús rimashca horas chi tupui aca, pai rimaushcai: Camba churi causaunmi, nisha. Paiga, entero huasii tiajgunandi quirinauca. 54 Caita ishqui cuti Jesús ali munanaita ricurinara rarcami, Jesús Galileama shamujpi.

Suchu ruñara alichin

5:1 Chimanda huasha, judioguna ista punzhauna tiajpi, Jesús Jerusalem ma sicaca. 2 Jerusalem, borreguna pungu mayambi, shu ichilla yacu cocha tiaca. Hebreo shimii cai yacu Betesda nishcami. Pichca rumi istandiyuj pungura charica. 3 Cai punguunai ashca unguishcauna sirinauca, ñausa ñahuiyujguna, anga chaquiuna, suchuuna. Tucui caiguna yacu cuyurishcara chapanauca. 4 Huaquin horas shu ángel yacuma irgumuj aca, yacura cuyuchingaj. Yacu cuyurishca huasha, ñaupá punda yacui icuj runa ima unguimandas alichishca aca. 5 Chihui shu runa tiaca, quinsa chungá pusac huatara unguishca. 6 Jesús paita ricusha, unai tiashcara yachasha, paita nica: ¿Aliyanara munanguichu? 7 Unguishca runa cutipaca: Señor, nisha, pitas mana charinichu yacu cuyurijpi ñucara yacui satíngaj; ñucalla alimanda shamungama, shuj ñucamanda ñaupara irgun. 8 Jesús paita nica: Atari, cambia puñunara api, puri. 9 Chi horasllaira cai runa aliyashca aca. Puñunara apisha ricami. Samana punzha aca. 10 Shinajpi judioguna alichishca ruñara ninauca: Samana punzhami; cambia puñunara apañara mana ushanguichu. 11 Runa cutipaca: Ñucara alichij runa rimahuaca, Puñunara apisha, puri, nica. 12 Shinajpi ruñara tapunauca: ¿Pita acai canda casna rimaj: Puñunara apisha puri, nij? 13 Aliyashca runaga pi ashcaras paita alichijta mana yachacachu, Jesús chimanda rishca ajpi. 14 Huashaga, Jesús cai ruñara templo huasii tupasha, paita nica: Ña alichishca angui; uchara ama cuti rangui, ama huasha yalijta unguingaj. 15 Runa rishaga, judiogunara cuentaca: Jesusmi ñucara alichij aca, nisha. 16 Chimanda judioguna Jesusta tormendachinauca, paita huañuchingaj nisha

mascanauca, caigunara samana punzhai rashcamanda. 17 Jesús paigunara nica: Ñuca Yaya cunagamas tarabaun, ñucas tarabauni. 18 Shinajpi chimanda judioguna Jesusta huañuchingaj astaun mas mascanauca samana punzha yachaira mana casushcamanda, shinallara Dios ñuca Yayami nishcamanda, shina nisha paulara Dios tupullara rasha.

Jesuspa mandana

19 Shinajpi Jesús cutipasha nica: Ciertu pacha cangunara nini: Churi pai quiquin munaimandalla mana imaras ranara ushan. Yaya rashcara ricusha chillararami ran. Imaras Yaya ran, shinallarami Churi ran. 20 Yayaga Churira Ilaquin, tucui pai rashcaunara Churira ricuchin. Caimanda yalijta rashcaunara paita ricuchingami canguna manzharingaj. 21 Imasna Yaya huañushcaunara causachin, paigunara causaira cusha, shinallarami Churi pai munashca runaunara causaira cun. 22 Yaya mana pitas taripanzhu, randi tucui taripana Churima cushcami. 23 Casna tucun tucui runa Churira ahuayachinauchu, paiguna Yayara ahuayachishca cuenta. Maicans Churira mana ahuayachisha, paita cachamuj Yayarasa mana ahuayachinzhu. 24 Ciertu pacha cangunara nini: Maicans ñuca shimira uyasha, ñucara cachamujpi quirishas, paiga huiñai causaira charin; mana causayuj tucungachu, astaun huañuimanda causaima ña pasashcami. 25 Ciertu pacha cangunara nini: Horas shamun, cunallaras pactarin, imahoras huañushcauna Diospa Churi shimira uyanaungami, uyajgunas causarinaungami. 26 Imasna Yaya paillaira causaira charin, shinallara Churira cuca paillaira causaira charingaj. 27 Shinallara taripangaj ushaira paita cuca, pai Runa Churi ashcamanda. 28 Caimanda ama manzharinguichi. Horas shamungami tucui pambariajguna paihua shimira uyanaungami. 29 Alira rajguna causangaj causarinaunga; randi manalira rajguna causayachi tucungaj causarinaungami.

Cristomanda rimaj shimi

30 Ñuca munaimandallara mana ima ranara ushanichu. Uyashca tupullara taripani. Ñuca taripashcaga ali tupumi. Ñuca quiquin munaira mana ranichu, astaun ñucara cachamuj Yaya munashcara rauni. 31 Ñucaga ñucamandallara rimasha, casna rimashca mana ciertochu. 32 Shujga ñucamanda rimanmi. Pai ñucamanda rimashcara cierto ajta yachani. 33 Cangunaga Juanma uyajgunara cachacanguichi. Pai cierto shimimanda rimacami. 34 Ñuca pi runamandas pai rimashcara mana apinichu; astaun caita rimani canguna quishpichi tucungaj. 35 Juan sindij velasna punzhayachij aca. Canguna pai punzhayachishcai ansa chi tempora cushiyasha nicanguichi. 36 Ñucaga Juan rimashca shimimanda yali valij shimira charinimi. Yaya ñucara cuhuashca ranaunara rangaj, shinallara rauni. Caigunaga Yaya ñucara cachamushcara rimanaun. 37 Shinallara ñucara cachamuj Yaya ñucamanda riman. Paihua shimira mana imahoras uyashcanguichi. Paihua sanaras mana imahoras ricushcanguichi. 38 Pai rimashca shimira canguna corazombi causajta mana charinguichi. Pai cachamushca Churira mana quiringuichi. 39 Quillcashcaunara ricuichi. Canguna iyaringuichi chihui huiñai

causaira charinguichimi. Chi Quillcashcauna ñucamanda rimanaun. 40 Ñucama shamunara mana munanguichi causaira charingaj. 41 Runaunamanda ahuayachishcara mana chasquinichu. 42 Cangunara ricsini. Canguna shungu ucui Diosta mana llaquinguichi. 43 Ñucaga ñuca Yaya shutii shamushcani. Cangunaga ñucara mana chasquinguichi. Shujga paihua quiquin shutii shamujpi, canguna paita chasquinguichima. 44 Cangunaga, ¿imasna quirinara ushanguichi? Canguna shujgunamanda ahuayachishcara parijumanda chasquinaunguichi. Astaumbas shu sapalla Diosmanda shamuj ahuayachishcara mana mascanguichi. 45 Ama iyaichichu ñuca cangunara causayachisha Yaya ñaupajpi. Shujga cangunara causayachin, canguna quishpichihuangami niushca Moisés. 46 Canguna Moiesta quirjpiga, ñucaras quiringuichima. Pai ñucamanda quillcacami. 47 Canguna pai quillcashcara mana quirijpiga, ¿imasnara ñuca rimashca shimira quiringuichima?

Pichca huaranga runauna micunaun

6:1 Caimanda huasha, Jesús Tiberias nishca Galilea lamar 2 Ashca runa paita catimunauca, pai munanaita ricurinaunara unguishcaunahua rashcara ricushcamanda. 3 Jesús urcui sicasha chihui tiarica pai yachachishca runaunandi. 4 Judioguna Pascua nishca ista mayallayauca. 5 Jesús muyujta ricusha, ashca runauna paihuajma shamujgunara ricusha, Felipe rimaca: ¿Maimanda tandara randishun tucui caiguna micungaj? nisha. 6 Cai shimira Jesús rimaca paita camangaj. Paiga imasna. rana ashcaras yachacami. 7 Felipe paita cutipaca: Ishqui patsaj cullqui tupu tanda mana pactangachu caran dueño ansa ansa micungaj. 8 Shu pai yachachishca runa, Andrés, Simón Pedro uqui, Jesusta rimaca: 9 Caibi shu huahua, pai pichca cebadamanda rashca tandara ishqui ichilla yacu aichahuaras charin. ¿Imarasha pactangairi cai tucuir carangaj? 10 Shinajpi Jesús nica: Runaunara tiachichi. Chi llactai ashca quihua tiaca. Pichca huaranga tupu cariuna tiarinauca. 11 Jesús tandaunara apisha, Diosta agrasishca huasha, yachachishca runaunama tandara cuca. Yachachishca runauna tiajgunara cunauca. Shinallara ichilla aichahuaras caranma cunauca, paiguna munashca tupura. 12 Runauna sajsajta micushca huasha, Jesús pai yachachishca runaunara nica: Puchuunara pallaichi, imaras ama ichuringaj. 13 Shinajpi chungu ishqui tasauna undajta pallanauca, chi pichca cebada tandaunamanda micujguna puchuchishcara. 14 Chi runauna, Jesús cai munanaita ricurinara rashcara ricusha, ninauca: Cierta pacha caimi Diosmanda rimaj, cai pachama shamuna aj. 15 Jesusga paiguna shamungaraushcara riparasha, paita apingaj Rey Apura rangaj, cuti pailla urcuma anzhuricami sapalla tiangaj.

Jesús yacu ahuai purin

16 Ña tutayaupi, Jesús yachachishca runauna lamarma irgunauca. 17 Shu canoai icusha, lamar chimba partima rinauca, Capernaum llactama. Ña tutayashcami, Jesús paigunama chara mana shamucachu. 18 lamar tsajlas tucuca shinzhi huairashcamanda. 19 Paiguna canoai shu samai tupura purishca huasha, Jesusta yacu

ahuara puriuta ricunauca. Canoa mayanma shamujpi, paiguna manzharinauca. 20 Jesús paigunara nica: Nuca mani. Ama manzhaichichu. 21 Shinajpi paiguna Jesusta munaihua chasquinauca canoai. Uctalla allpama pactamunauca, paiguna riushca llactama.

Jesusta mascanaun

22 Cayandi punzha, chimba partii causajguna shu canoalla tiashcara ricunauca, shinallara Jesús mana rishcara yachachishca runaunahua chi canoai, randi yachachishca runauna paigunalla rinaushca aca. 23 Shinajllaira shu ichilla canoana Tiberias llactamanda shamunaushca aca, runauna micushca pamba mayanma shamusha maibi runauna micunauca Jesús Diosta agrasishca huasha. 24 Runauna Jesús illajta ricusha, shinallara pai yachachishca runaunas illajta, paiguna ichilla canoanai icusha, Capernaum llactama rinauca, Jesusta mascasha.

Jesús causana tandami

25 Paiguna Jesusta lamar chimbama ajta tupasha, paita ninauca: Yachachij, ¿imahoras caima pactamucanguí? 26 Jesús paigunara cutipaca: Cierta pacha nini, canguna ñucara mascahuanguichi, mana munanaita ricushcamanda, astaun tandara sajsajta micushcamanda. 27 Tarabaichi, mana yanga pasanalla micunamanda, astaun huiñai causaigama duraj micunamanda. Cai sami micunara Runa Churi cangunara cunga; casna rangaj Yaya Dios paita ricuchicami. 28 Jesusta ninauca: ¿Imara rashun Dios rashcaunara rangaj? 29 Jesús cutipasha nica: Caita Dios ranami: canguna pai cachamushca runai quirinauchu. 30 Shinajpi paiguna ninauca: ¿Ima munanaita ricurinara ranguichu can, ñucanchi ricusha quiringaj? ¿Imara rangui? 31 Ñucanchi yayauna Maná nishca micunara micunauca chaquishca allpa partii, Quillcai quillcashcasna: Ahua pachamanda tandara paigunama micungaj cucami, nisha. 32 Jesús paigunara nica: Cierta pacha cangunara nini: Chi ahua pachamanda tandara mana Moisés cushcachu aca, astaun ñuca Yaya cangunara ahua pachamanda cierta tandara cunmi. 33 Ahua pachamanda irgumuj runa, caimi Diosmanda tanda. Paiga cai pachara causaira cun. 34 Runauna paita ninauca: Señor, tucui horas cai tandara cuhuai. 35 Jesús paigunara nica: Ñuca causaira cuj tanda mani. Maicans ñucama shamuj, mana imahoras yarcachingachu. Maicans ñucajpi quirij, huiñai causaigama mana imahoraspas upinaichingachu. 36 Astaun cangunara rimashcani, ñucara ricushallara mana quiringuichi. 37 Yaya tucui ñucama cuhuashca ñucama shamunga. Maicans ñucama shamujta mana callpachishachu. 38 Ahua pachamanda irgumucani, mana ñuca munaira rangaj, astaun ñucara cachamuj munashcara rangaj. 39 Caitami ñucara cachamuj Yaya munai: Tucui ñucara cuhuashcamanda ama imaras chingachichu, astaun puchucái punzhai paita causachingaj. 40 Caitami ñucara cachamujpa munai: Tucui maicambas Churira ricuj, paihuajpi quirij, huiñai causaira charichu; puchucái punzhai ñuca paita causachisha. 41 Shinajpi judioguna piñarinauca Jesús rimashcamanda: Ñuca ahua pachamanda shamuj tanda mani, nishcamanda. 42

Ninauca: ¿Manzhu cai Jesús José churi? Paihua yayaras paihua mamaras ricsinchi. Shinasha, ¿imarasha nin, ahua pachamanda shamucani? 43 Jesús cutipasha paigunara nica: Ama piñaringuichi cangunapura. 44 Pihuas ñucama mana shamun, ñucara cachamuj Yaya mana paita pushamujpi. Puchucái punzhai ñuca paita causachisha. 45 Diosmanda rimajguna quillcashcaunai quillcashca tian: Dios tucui runaunara yachachingami. Shinajpi tucui Yayara uyaj, paimanda yachaj, ñucama shamunga. 46 Pihuas Yayara mana ricushcachu; Diosmanda shamuj, pailla Yayara ricushcami. 47 Cierta pacha cangunara nini: Maicans ñucajpi quirisha huiñai causaira charin. 48 Ñuca causaira kuj tanda mani. 49 Canguna yayauna chaquishca allpa partii Maná nishca micunara micunauca, micusha huañunauca. 50 Randi, caimi ahua pachamanda shamuj tanda, maican cai tandara micusha ama huañuchu. 51 Ñucaga causaj tanda mani, ahua pachamanda shamuj. Maicans cai tandara micusha huiñaigama causangami. Ñuca cushca tanda ñuca quiquin aichami. Cai aicharaga cai pacha causana randimanda cushami. 52 Shinajpi judioguna paigunapura rimananauca: ¿Imarasha cai runa paihua quiquin aichara micungaj cungachu? nisha. 53 Jesús nica: Cierta pacha cangunara nini: Runa Churi aichara mana micusha, paihua yahuarda mana upisha, causaira mana charinguichichu cangunajpi. 54 Maicans ñuca aichara micuj yahuarda upij huiñai causaira charin; puchucái punzhai ñuca paita causachishami. 55 Ñuca aicha cierta micunami; ñuca yahuar cierta upinami. 56 Ñuca aichara micuj ñuca yahuarda upij ñucajpi tiaun, ñucas paihuajpi. 57 Imasna causaj Yaya ñucara cachaca, ñucas Yayamanda causaunimi, shinallara maicans ñucara micusha ñucamanda causangami. 58 Caimi ahua pachamanda irgumuj tanda. Mana canguna yayauna Maná nishcara micusha huañushcasna, astaun cai tandara micuj huiñaigama causangami. 59 Jesús cai tucuir judioguna tandarina huasii rimaca, pai Capernaum llactai yachachiushcai.

Huiñai causana shimiuna

60 Pai yachachishca runaunamanda ashcauna cai rimashcaunara uyasha: Cai shimi yapa mana chasquihuajchu, ninauca. ¿Pita caita uyanara ushangairi? 61 Jesús paigunapura caimanda piñarishcara paihua shungüi yachasha, nica: ¿Cai shimichu cangunara piñachin? 62 ¿Imara ninguichima canguna Runa Churi pai ñaupá tiashcama sicachiushcara ricusha? 63 Espíritu causaira cun. Aichaga mana imajtas sirvin. Ñuca canguna rimaushca shimiuna espiritumi, causaimi. 64 Randi cangunamanda huaquinguna mana quiringuichi. Jesusga callarimanda mana quirijgunara ricsicami, shinallara paita huañuchingaj apichingarau ruñarás ricsicami. 65 Jesús rimaca: Chiraigumanda nicani: Pis ñucama shamunara mana ushan Yaya mana paita cujpi shamungaj. 66 Caimanda pacha, pai yachachishca runaunamanda ashcauna tigranauca, paihua pariju purinara saquinauca. 67 Shinajpi Jesús pai chungá ishqui runaunara nica: ¿Cangunas shinallara saquinara munanguichi? 68 Simón Pedro cutipasha: Señor, nica, ¿pihuajmara rishunzhu? Canlla huiñai causaira cuentaj shimiunara rimanguí. 69 Can Cristo nishca causaj Diospa Churi ashcara quirishcanchi, ricsinchimi, nica. 70 Jesús cutipaca: ¿Manzhu ñuca cangunara chungá ishquira

ajllashcani, shinajllaira cangunamanda shuj supaimi? 71 Judas Iscariote, Simomba churimanda rimaca. Paiga Jesusta apichingarau runa aca. Pai chi chungá ishquimanda shuj aca.

Jesuspa uquiuna mana quirinaun

7:1 Caimanda huasha, Jesús Galilea partii puriuca. Judea partirá purinara mana munacachu, judioguna paita huañuchingaj mascashcamanda. 2 Judioguna ichilla huasi rana ista mayanllayamuca. 3 Jesuspa uquiuna paita: Caimanda llucshi, ninauca, Judea partima ri, can yachachishca runauna can rashcaunara ricunauchu. 4 Maican runas ricsi tucusha nisha mana pacalla raun. Can cai rashcaunara rasha, canllara pajlla pambai ricuchi tucui runaunama. 5 Paihua uquiuna paihuajpi mana quirinaucachu. 6 Shinajpi Jesús paigunara nica: Ñuca punzha chara mana pactamun. Canguna punzhaga tucui horas puruntumi. 7 Cai pacha runauna cangunara chijninara mana ushanaunzhu. Randi ñucara chijnihuanaun ñuca paigunara rimashcamanda, Canguna rashcauna manalichu, nisha. 8 Cangunaga istama sicaichi; ñucaga chara mana rinichu, ñuca punzha chara mana pactarinzhu. 9 Caita rimashca huasha Galileai saquirica.

Jesús ichilla huasira rana istai

10 Paihua uquiuna rishca huasha, Jesús shinallara istama sicasha rica, mana pajllai astaun pacallai ricami. 11 Istai judioguna Jesusta mascanauca: Paiga, ¿maibirairi? nisha. 12 Jesusmanda rimananauca ashcara. Huaquinguna: Pai ali runami, nisha; shujgunaga: Mana, nisha, pai runaunara umachin. 13 Pihuas pajllai paimanda mana rimacachu, judiogunara manzhashcamanda. 14 Chaupi istai Jesús templo huasima sicasha yachachicami. 15 Judioguna manzharinauca: Paiga, ¿imasnara quillcashcaunara yachan, ninauca, pai mana yachachishca ajllaira? 16 Jesús cutipasha nica: Ñuca yachachiushcara mana ñucajchu, randi ñucara cachamujmandami. 17 Maicans Diospa munaira pactachinara munashaga, yachachishcamanda yachangami, Diosmandachu shamun, ñucamandallachu rimauni. 18 Maicans pai quiquinmandallara rimausha, pai quiquin ahuayanara mascan. Astaun maicans paita cachamujpa ahuayanara mascau, paiga cierto rimajmi, paihuajpi ima Hullas illan. 19 ¿Manzhu Moisés ley camachishca shimira cangunara cuca, shinajllaira cangunamanda mana pihuas cai camachishcara pactachin? ¿Imamanda ñucara huañuchingaj mascaunguichi? 20 Runauna cutipanauca: Supaira charingui, nisha. ¿Pita canda huañuchisha nin? 21 Jesús paigunara cutipaca: Shu rashcara rarcani; tucui canguna cai rashcamanda manzharinguichi. 22 Ciertu pacha Moisés cangunara circuncisión nishca aichai ricurij señalda cuca, randi mana paimandallachu aca, astaun rucuunamandami. Shinasha, samana punzhai cai circuncisión nishca camachishcara cariunahua pactachinguichi. 23 Cariuna circuncisión nishcara chasquijpi samana punzhai, Moisés camachishcara ama paquingaj, ¿imarasha ñucara piñahuanguichi ñuca shu ungushca ruñara alichishcamanda samana punzhai? 24 Ricushcamandalla ama taripaichi, astaun ali cierto taripanara taripaichi.

Caiga ¿Cristochu?

25 Shinajpi huaquin Jerusalembi causajguna ninauca: ¿Manzhu cai ruñara mascanauca huañuchingaj? 26 Ricuichi imasna pai pajllai rimaun; pihuas paita mana imaras nin. ¿Cai runa quiquin Cristo ashcara cierto pacha intindinaushcachu atun apuuna? 27 Cai runaga, maimanda pai shamushcara ricsinchi. Cristo shamujpiga, pai shamushcara pihuas mana yachangachu. 28 Shinajpi Jesús templo yachachisha, caparisha rimaca: Ñucaras ricsinguichi, nisha, ñuca maimanda shamushcaras shinallara yachanguichi. Ñuca quiquinmandallara mana shamucanichu; astaun ñucara cachamuj, pai ciertomi. Paitaga mana ricsinguichi canguna. 29 Ñucaga paita ricsinimi. Paimanda ani. Paiga ñucara cachamucami. 30 Shinajpi Jesusta apingaj camanauca. Shinajllaira mana pihuas paita apica, paihua horas chara mana pactamujpi. 31 Ashca runauna paihuajpi quirinauca: Cristoga pai shamushcai, ¿caimanda yalijta munanaita ricurinaunara rangachu? nisha.

Jesusta apingaj cachanaun

32 Fariseoguna runauna Jesusmanda casna rimanaushcara uyanauca. Sacerdote apuuna fariseogunandi guardaunara cachanauca Jesusta apingaj. 33 Shinajpi Jesús nica: Chara ansa tempora cangunahua tiasha, chihuasha ñucara cachamujma rishami. 34 Ñucara mascahuanguichimi, randi mana tupahuanguichichu. Maibi ñuca tiaushcama chima shamunara mana ushanguichichu. 35 Shinajpi judioguna paigunapura ninauca: ¿Maimara ringai ñucanchi paita mana tupangaj? ¿Griegouna llactai tij sayashca runaunamachu ringái paigunara yachachingaj? 36 ¿Imarai cai shimi: Ñucara mascahuanguichimi, randi mana tupahuanguichichu. Maibi ñuca tiaushcama chima shamunara mana ushanguichi? ¿Imara nin?

Causaj yacumanda riman

37 Ista puchucái punzhai, atun ista punzha asha, Jesús shayarisha caparica: Maicans upinaichisha ñucama shamuchu, upichu, nica. 38 Maicans ñucajpi quirij, Diospa Quillcai quillcashcasna, paihuajmanda causana yacuuna llucshimunaungami. 39 Jesús caita rimasha, paihuajpi quirijguna apingaraushca Espiritumanda rimaca, chara Santo Espíritu mana shamushca ajpi, Jesús chara mana sumacyachishcamanda.

Runauna chaupirishca Jesusmanda

40 Shinajpi taucarai runaunamanda huaquinguna caita uyasha: Ciertu pacha cai runa Diosmanda rimajmi ninauca. 41 Shujgunaga: Caimi Cristo ninauca. Huaquingunaga: ¿Cristo Galileamandachu shamunga? ninauca. 42 ¿Manzhu Diospa Quillcai quillcashca tian: Cristo David miraigunamanda, Belén llactamanda, David iñashca llactamanda shamungami? ninauca. 43 Shinasha, Jesusmanda paigunapura piñanausha rimananauca. 44 Paigunamanda huaquinguna Jesusta apisha ninauca;

randi pihuas paita mana apicachu.

Pi runas mana casna rimashcachu

45 Guardauna sacerdote apuunama fariseogunamas tigranauca. Apuuna shamujgunara ninauca: ¿Imarasha paita mana apamucanguichi? 46 Guardauna cutipasha: Mana pi runas pai rimashcasna imahoras rimashcachu, ninauca. 47 Shinajpi fariseoguna cutipanauca: ¿Cangunas shinallara umachi tucushcanguichi? 48 ¿Huaqinguna apuunamandas fariseogunamandas paihuajpi quirinaushca chari? 49 Cai yanga runaunaga, ley camachishca shimira mana yachajguna, maldiciashcaunami, ninauca. 50 Nicodémoga, pai ñaupá Jesusma tutai shamuj, apuunamanda asha, paigunara nica: 51 ¿Ñucanchi ley camachishca shimi shu ruñara taripanzhu paimanda manara uyasha, pai rashcara manara yachasha? 52 Fariseoguna cutipasha paita ninauca: ¿Can Galilea runachu angui? Ricupai, mascapai, Galileamanda ima rimajpas mana imahoraspas ataricachu. 53 Caran dueño paihua huasima rica.

Shujhua tacarij huarmimanda

8:1 Jesús Olivos nishca urcuma rica. 2 Cayandi tutamanda templo huasima tigraca. Tucui runauna paima shamunauca. Jesús tiarisha paigunara yachachica. 3 Shinajpi yachaira yachachijguna fariseogunandi Jesusma shu manali causaj huarmira pushamunauca, shujhua tacariushcai apishca aca. Paita paiguna chaupi shungüi shayachinauca. 4 Paiguna Jesusta: Yachachij, ninauca, cai huarmira shujhua tacariushcai apishca aca. 5 Moisés ley camachishca shimii casnaunara rumihua shitasha huañuchinami nisha mandaca. Canga, ¿imara ningui? 6 Cai tucuirá Jesusta ninauca paita tentasha, paita causayachingaj. Jesusga alpama cumurisha maqui rerohua allpai quillcaca. 7 Paiguna paita maspas tapusha, Jesús shayarisha nica: Cangunamanda maicans ucha illaj asha ñaupá rumihua shitachu paita. 8 Jesús cuti cumurisha allpai quillcaca. 9 Paigunaga, uyashallara, iyaibi pingarisha, shuj shujlla llucshisha rinauca, rucuunamanda maltaunagama. Jesusga sapalla saquirica, chaupi shungüi shayau huarmindi. 10 Jesús atarisha, huarmi sapalla ajta ricusha, paita nica: Huarmi, ¿maibirai canda causayachijguna? ¿Mana pihuas canda causayachishcachu? 11 Huarmi nica: Mana pihuas, Señor. Shinasha Jesús paita nica: Ñucas canda mana causayachinichu. Rilla, ama mas cuti ucharaichu.

Jesús cai pachara punzhayashca

12 Cuti Jesús paigunara rimaca: Ñucaga cai pacha punzha mani, nisha. Ñucara catimuj runa llandui mana puringachu; astaun cai causai punzhara charingami. 13 Shinajpi fariseoguna paita ninauca: Can quiquinmandallara rimaungui. Mana valinzhu can rimashca shimiuna. 14 Jesús cutipaca: Ñuca quiquinmandallara rimasha, ñuca rimashcaga valinmi. Ñuca maimanda shamushcara maima rinaras yachanimi. Randi, canguna ñuca shamushcara ñuca rinaras mana yachanguichichu. 15 Canguna runa

tupullara taripanguichi. Ñucaga pitas mana taripanichu. 16 Ñuca taripajpi, ñuca taripashca ciertomi. Ñuca mana sapallachu ani, astaun ñucas ñucara cachamuj Yayandi. 17 Canguna ley camachishca shimii quillcashca tian: Ishquipura rimashca ciertomi. 18 Ñuca quiquinmanda rimani. Ñucara cachamuj Yayas, pai shinallara ñucamanda riman. 19 Fariseoguna: Camba Yayaga, ¿maibirai? ninauca. Jesús cutipaca: Ñucaras, ñuca Yayararas, mana ricsihuanguichichu. Ñucara ricsishaga, shinallara ñuca Yayararas ricsinguichimami. 20 Cai shimiunara Jesús rimaca cullquira tandachina pistui, pai templo huasii yachachiusha. Pihuas paita mana apicachu, paihua horas manara pactarijpi.

Ñuca riusncama mana ushanguichi shamunara

21 Cutillara Jesús paigunara nica: Riunimi. Canguna mascahuanguichimi, astaun canguna ucharashcai huañunguichimi. Ñuca riusncama shamunara mana ushanguichichu. 22 Shinajpi judioguna ninauca: ¿Pai quiquinllara huañuchingachu, pai nisha: Ñuca riusncama shamunara mana usharcguichichu? 23 Jesús paigunara nica: Uramanda anguichi, ñucaga ahuamanda ani. Canguna cai pachamandami anguichi, ñucaga mana cai pachamandachu ani. 24 Chiraigumanda cangunara nicani: Canguna ucharashcaunai huañunguichimi. Canguna ñuca ajta mana quirijpiga, canguna ucharashcaunai huañunguichimi. 25 Paita ninauca: Canga, ¿Pitangui? Shinajpi Jesús paigunara nica: Ñuca cangunara ñaupapunda cuentashcasna ani. 26 Cangunara rimangaj taripangajpas ashcara charini. Ñucara cachamuj cierto rimajmi. Ñuca paimanda imara uyashcaras chillara cai pachai rimauni. 27 Runaunaga mana intindinaucachu pai Yayamanda rimashcara. 28 Shinajpi Jesús paigunara nica: Canguna Runa Churira atarichishca huasha, ñuca ajta intindinguichimi. Shinallara intindinguichimi ñucamandallara mana imaras ranichu. Astaun imara Yaya ñucara yachachishcara, chillara rimauni. 29 Ñucara cachamuj ñucahua pariju tian. Yaya ñuca sapallara mana saquihuashcachu. Ñucaga tucui horas pai munashcasna rani. 30 Jesús shina rimajpi, ashca runauna paihuaajpi quirinauca.

Cierto shimi cangunara llushpichinga

31 Shinajpi Jesús paihuaajpi quirij judiogunara nica: Canguna ñuca shimiunai causausha, cierto pacha ñuca yachachishca runauna tucunguichimi. 32 Cierta shimira yachanguichimi. Cai cierto shimiga cangunara liuriyachingami. 33 Paiguna Jesusta cutipanauca: Abrahammanda miraiguna anchi, imahoras pitas mana sirvishcanchichu. ¿Imarasha ningui, Liuriyachishcauna anguichi? 34 Jesús paigunara cutipaca: Cierta pacha cangunara nini, maicans uchara rasha, uchara sirvij tucun. 35 Sirvijga mana tucui horas huasii saquirinzhu. Randi, churi huiñaigama huasii tiaun. 36 Shinajpi Churi cangunara liuriyachijpi, cierto pacha liuriyachishcauna tucunguichimi. 37 Canguna Abrahammanda miraiguna ajta ricsinimi. Randi, ñucara huañuchingaj mascanguichi, ñuca shimiuna canguna shungüi mana icushcamanda. 38 Ñuca Yaya ñaupajpi ricushcara rimauni. Cangunas canguna yaya ñaupajpi uyashcaras raunguichi.

Supai apu canguna yayami, nica

39 Paiguna cutipanauca: Ñucanchi yaya Abrahanmi. Jesusga nica: Canguna Abrahamba churiuna asha, Abraham rashcaunara ranguichimami. 40 Cunaga ñucara huañuchinara mascanguichi, ñuca Diosmanda uyashcara cierto shimira rimaj. Abraham mana caita rarcachu. 41 Canguna yaya rashca tupura ranguichi. Shinajpi judioguna paita ninauca: Ñucanchi mana shujhua tacarishcamanda pagarishcachu anchi. Shu yayara charinchi, paiga Diosmi. 42 Shinajpi Jesús paigunara nica: Dios canguna yaya ajpi, cierto pacha ñucara llaquinguichima. Diospajmanda llucshishcani, shamushcani. Ñucamandallara mana shamucanichu, astaun pai ñucara cachamuca. 43 ¿Imarasha ñuca shimira mana intindinguichichu? Ñuca rimashcara mana uyashcamanda mana intindinguichichu. 44 Cangunaga canguna supai apu yayamanda anguichi. Canguna yaya munashcara pactachinara munanguichi. Paiga callarimanda pacha huañuchij aca, cierto shimira mana rimacachu, paihuajpi cierto rimana mana tian. Paiga llullara rimasha, pai quiquinmanda riman. Pai llullajmi, shinallara llullanahua yayami. 45 Nucaga cierto shimira rimashcamanda, mana quirinhuanguichi ñucara. 46 ¿Cangunamanda maican ñucara uchamanda causayachinzhu? Ñuca cierto shimira rimasha, ¿imaraigu mana quirihuanguichi? 47 Maicans Diosmanda aj, Dios rimashcara uyan. Caimanda mana uyahuanguichi, canguna mana Diosmanda ashcaraigu.

Jesús callari horasmanda causaj

48 Shinajpi judioguna Jesusta cutipanauca: ¿Manzhu ali rimashcanchi, Can Samaría runa angui, supaiyuj angui? nisha. 49 Jesús cutipasha rimaca: Supaira mana charinichu, astaun ñuca Yayara ahuayachiuni. Cangunaga ñucara mana ahuayachinguichichu. 50 Ñuca quiquin ahuayanara mana mascanichu. Shujga mascan, taripan. 51 Ciertu pacha cangunara nini: Maicans ñuca rimashcara huacachisha, huiñaigama huañuira mana ricungachu. 52 Shinajpi judioguna paita ninauca: Cuna yachanchi supaira charingui. Abraham huañuca, Diosmanda rimajgunas huañunauca. Canga ningui: Pihuas ñuca shimira pactachisha huiñaigama huañuira mana ricungachu. 53 Canga, ¿ñucanchi yaya Abrahanmanda yalichu angui? Pais huañuca, shinallara Diosmanda rimajgunas. Canga, ¿pita tucusha ningui? 54 Jesús cutipaca: Ñucaga ñucamandallara ahuayasha, chi ahuayana mana imajtas valin. Ñuca Yayaga ñucara ahuayachinmi. Paimanda canguna, Ñucanchi Diosmi, ningui. 55 Paitaga mana ricsinguichi, randi ñuca paita ricsinimi. Ñucaga: paita mana ricsinichu nisha, cangunasma llullaj tucuima. Randi, ñuca paita ricsinimi, shinallara pai rimashcara pactachini. 56 Canguna Abraham yaya ñuca punzhara ricungarausha cushiyaca. Ricucami, ricushaga cushi tucuca. 57 Shinajpi paiguna: Can manara pichca chungu huatara charingui, ¿Abrahanda ricushcanguichu? ninauca. 58 Jesús cutipaca: Ciertu pacha cangunara nini: Manara Abraham tiajlaira, ñuca mani. 59 Judioguna caita uyasha rumiunara apinauca paita shitangaj. Randi Jesús pacalla risha templomanda llucshica; paiguna chaupi shungura pasasha rica.

Ñausa ruñara alichishca

9:1 Jesús chimanda pasaushcai, shu ñausa pagarij ruñara ricuca. 2 Yachachishca runauna paita: Yachachij, ninauca: ¿Pi ucharashcamanda cai runa ñausa pagarimuca, paulara paihua yayaunamanda? 3 Jesús cutipaca: Mana pai ucharashcamanda, mana paihua yayauna ucharashcamanda ñausa pagarica. Shina tucuca Dios ranaunara paihuajpi ricuchingaj. 4 Ministirinmi ñucara cachamujpa ranaunara rangaj punzha ajllaira. Tuta shamujpi mana pihuas ushan tarabanara. 5 Ñuca cai pachai tiaushca horas, cai pacha punzha ani. 6 Casna rimasha, Jesús allpai tiucaca, tiucahua turura apiyachica, turura ñausa runa ñahuii llutaca. 7 Shina rasha Jesús paita: Ri, nica, maillairi Siloé nishca yacui. Cai Siloé shuti runa shimii, Cachashca, nin. Shinajpi runa ricami, maillaca. Ricusha tigramucami. 8 Paihua mayambi causajguna pai ñausa ashcara ricsijgunas ninauca: Caiga, ¿manzhu mañasha tiaj runa? 9 Huaqinguna: Paimi, ninauca. Shujgunaga: Chilla ricurij yachin. Pai quiquinllara: Ñuca mani, nica. 10 Paita ninauca: Camba ñahui ¿imasna rasha pascarinauca? 11 Runa cutipasha: Chi Jesús nishca runa turura rasha ñahuii llutaca. Siloema ri maillangaj, niyuaca. Ñucaga ricani, maillacani, maillasha ricuj tucucani. 12 Shinajpi: ¿Pai maibirai? ninauca: Runaga: Mana yachanichu, cutipaca.

Fariseoguna alichishca ruñara tapunaun

13 Fariseogunama cai ñaupá horas ñausa aj ruñara pushanauca. 14 Samana punzha maca Jesús turura rasha paihua ñahuiunara pascaca. 15 Paiguna cuti paita tapunauca: ¿Imasna rashara ricuj tucucangui? nisha. Runa paigunara nica: Ñahui ahuai turura llutaca, maillacani, ricuj tucuni. 16 Shinajpi fariseogunamanda huaqinguna: Cai runa mana Diosmandachu, ninauca, samana punzhara mana huacachin. Shujgunaga: Uchayuj runa, ¿imasna cai munanaita ricurinaunara rangachu? Parijumanda piñanausha rimananauca. 17 Cutillara ñausa aj ruñara rimanaun: Canga, ¿imara ningui paimanda, pai cambia ñahuirá pascajta? Runa cutipaca: Paiga Diosmanda rimajmi nini. 18 Judioguna pai ñausa ashcara ricuj tucushcaras mana quirinaucachu. Shinasha ñahuirá pascashca runa yayaunara cayanauca. 19 Paigunara tapunauca: ¿Caichu canguna churi, ñausa pagarij nishca? ¿Ima rasha cuna ricun? 20 Yayauna cutipasha: Cai ñucanchi churi ashcaras yachanchi, pai ñausa pagarishcaras yachanchi, ninauca. 21 Imarasha cuna ricuj tucushca, caita mana yachanchichu. Pi paihua ñahuirá pascashcaras mana yachanchichu. Paiga iyaiyuj runami, paita tapuichi, paulara rimangami. 22 Casna ninauca yayauna judiogunara manzhashcamanda. Judioguna ña rimanauca maicans Jesús Mesías nishcami nisha nij, pai tandarina huasimanda ichui tucunmami. 23 Chiraigumanda yayauna: Iyaiyujmi, paita tapuichi, ninauca. 24 Shinajpi ñausa aj ruñara cuti cayanauca; paita rimasha: Diosta alabairi, nisha, chi runa uchayuj ajta yachanchi, ninauca. 25 Shinajpi ñausa aj runa cutipaca: Uchayuj ashcara imasnaras mana yachanichu; caita yachani: Ñuca ñausa ashcara, cuna ricuuni. 26 Fariseoguna cutillara ruñara ninauca: ¿Imara rarcá canda? ¿Imasna rashara cambia ñahuirá pascaca? 27 Runaga paigunara cutipasha: Ña cangunara rimashcani, nica.

Uyanara mana munacanguichi. ¿Imarasha cuti uyanara munanguichi? ¿Cangunas shinallara pai yachachishca runauna tucunara munanguichi? 28 Paita caminauca, nisha: Canmi pai yachachishca runa angui; astaun ñucanchi Moisés yachachishca runauna manchi. 29 Dios Moiesta rimashcara yachanchi; randi cai runa maimanda pai ashcaras mana yachanchichu. 30 Runaga cutipaca: Ciertu pacha caita manzhaitami, canguna pai ajta mana yachanguichi, shina ajllaira ñuca ñahuirá pascahuacami. 31 Dios uchayujunara mana uyanzhu, caita yachanchi; randi maicans Diosta manzhasha, paihua munaira rashes, Dios paita uyanmi. 32 Callarimanda mana uyarishcachu aca shu runa pagarishcamanda ñausa ajta, ñahuirá pascai tucungaj. 33 Cai runa mana Diosmanda asha, mana imaras ranara ushanma. 34 Paita cutipasha ninauca: Can uchallai pagarimucanguí, ¿shinashas ñucanchira yachachihuanguí? Shinajpi, paita canzhama ichunauca. 35 Jesús paita ichushcara uyasha, paita tarisha rimaca: ¿Diospa Churu quiringuichu? nisha. 36 Runa cutipaca: ¿Paiga pitangairi, Señor, ñuca paihuajpi quiringaj? 37 Jesús nica: Paita ricushcanguí; canhua rimau ñuca mani. 38 Pai nica: Señor, quirinimi. Casna nisha Jesusta adoraca. 39 Jesús nica: Ñuca taripangaj cai pachama shamucani, mana ricujguna ricunauchu, ricujgunas ñausa tucunauchu. 40 Fariseogunamanda huaquinguna paihua pariju tiajguna cai shimira uyasha ninauca: ¿Ñucanchis shinallara ñausachu anchi? 41 Jesús nica: Canguna ñausa ashaga ucha illajguna anguichima; randi cuna: Ricunchimi, nisha, caimanda canguna ucha saquirin.

Borrego cularmanda cuentan

10:1 Jesús nica: Ciertu pacha cangunara nini: Maican runa borrego cularbi icusha, mana pungura pasasha, astaun shu partii quinzhara sicasha, casna runa shuhujmi. 2 Maican runa pungullara icusha, pai borregora cierto cuirajmi. 3 Pungura cuiraj runa paihuajta pascan; borregouna paihua shimira uyanaun. Paiga borregounara shutii cayan, paigunara llucchin. 4 Tucui paihua quiquin borregounara llucchisha, ñaupasharin. Borregouna paita catinaun, paihua shimira ricsishcamanda. 5 Randi, borregouna shu mana ricsishca ruñara mana catinaungachu, astaun paimanda miticunaunga, shujguna shimira mana ricsishcamanda. 6 Cai yachachingaj cuentanara Jesús paigunara cuentacami. Pai rimashcara mana intindinaucachu.

Jesús ali cuirajmi

7 Shinasha Jesús cuti rimaca: Ciertu pacha cangunara nini, Ñuca borregouna pungu mani. 8 Tucui ñucamanda ñaupá shamujguna shuhujgunas shuhuasha huañichijunas anaun. Borregounaga paigunara mana uyanaucachu. 9 Ñuca pungu mani. Maican ñucahua icusha quishpi tucungami; icunga, llucshinga, micuna quihuara taringami. 10 Shuhuj apingajlla, huañuchingajlla, huajlichingajlla shamun. Randi ñuca shamucani borregouna causaira charinauchu; causaira charishaga talirijta charinauchu. 11 Ñuca borregora ali cuiraj ani. Ali cuirajga paihua causaira cun borregouna randimanda. 12 Randi, cuirangaj pagashca runa, pai mana quiquin cuiraj asha,

borregouna mana paihua quiquimbaj ajpi, shu puma shamushcara ricusha miticun, borregounara saquín. Shinasha puma borregounara apiipi, llambu chausirin. 13 Pai miticusha rin, pagashca runa ashcamanda; borregounara mana llaquin, mana cuirán. 14 Ñuca borregora ali cuiraj ani; borreogunara ricsini; ñuca borregouna ñucara ricsihuanaun, imasna Yaya ñucara ricsishcasna, shinallara ñucas Yayara ricsishcasna. 15 Borregouna randimanda ñuca causaira cuni. 16 Shinallara shu borregounara charini, mana cai cularbi tiajguna. Chigunaras pushamunara ministini. Paigunas ñuca shimira uyanaungami. Shu montonlla anaunga, shu cuirajlla tiangami. 17 Chiraigumanda Yaya llaquihuanmi, ñuca causaira cushcamanda, cuti causaira apingaj. 18 Ñuca causairaga pihuas ñucamanda mana quichun, ñucallara cuni. Cungaj ushaira charinimi, cuti apiñarás ushanimi. Cai mandashca shimira Yayamanda apicani. 19 Cutillara judiogunapura Jesús rimashcamanda piñanausha rimananauca. 20 Paigunamanda ashcauna ninauca: Supaira charin, nuspa tucushca, ¿Imaraigu paita uyanguichi? 21 Shujgunaga: Cai shimiuna mana supaiyujmandachu, ninauca. ¿Supaiga ñausa runa ñahuirá pascanara ushanzhu?

Judioguna Jesusta mana munanaun

22 Jerusalembi, templo huasira Diosma cushcara iyarina ista pactamuca. Tamia horas aca. 23 Jesús templo huasii puriuca, Salomomba pungüi. 24 Judioguna pai muyujta tandarisha, paita rimanauca: ¿Imahorasgama ñucanchi shungura turbachingui? nisha. Can Cristo ashaga, pajllai rimahuai. 25 Jesús cutipaca: Rimashcani, astaun canguna mana quiricanguichi. Ñuca Yaya shutii rashcauna ñucamanda rimanaun. 26 Cangunaga mana quiringuichi, mana ñuca borregounamanda asha, ñuca cangunara rimashcasna. 27 Ñuca borregouna ñuca shimira uyanaun. Paigunara ricsinimi, shinallara paiguna ñucara catimunaun. 28 Paigunara huiñai causaira cuni; huiñaigama mana huañunaungachu. Ñuca maquimanda pihuas paigunara mana quichungachu. 29 Ñuca Yaya paigunara cuhuaca. Yayaga tucuimanda yalimi. Ñuca Yaya maquimanda paigunara pihuas mana quichungachu. 30 Ñucahua Yayahua shujlla manchi. 31 Shinajpi judioguna rumiunara cuti apinauca paita shitangaj. 32 Jesús paigunara cutipaca: Ashca ali rashcaunara cangunara ricuchishcani ñuca Yayamanda. ¿Maicanmanda ñucara rumihua shitasha ninguichi? 33 Judioguna cutipanauca: Mana ima alira rashcamandas rumihua shitanchi, astaun can Diosta camishcamanda, can runa asimilara Dios tucusha nishcamanda, ninauca. 34 Jesús cutipaca: ¿Manzhu canguna ley shimii quillcashca tian, Nicani diosguna anguichi? 35 Diospa shimira chasquijgunara 'diosguna' shutichishcájpiga, shinashas Diospa shimi mana paquirinallachu, 36 ¿Yaya Dios chicanyachishca ruñara, cai pachama cachamushcara: Camishcangui, ninguichi, pai Diospa Churi ani nishcamanda? 37 Ñucaga Yayamanda rashcaunara mana rajpiga, ama quirihuaichichu. 38 Randi, ñuca casna rashcaunara rajpi, ñucara mana quirisha, rashcaunara quirichi, canguna ricsinauchu, quirinauchu Yaya ñucajpi tiashcara ñucas paihuajpi tiashcaras. 39 Cuti paita apingaj iyarinauca. Jesusga paiguna maquimanda quishpicami. 40 Jesús Jordán yacu chimbama rica, Juan ñaupá bautisaushcai. Chihui tiauca. 41 Ashca runauna paihuajma shamunauca.

Paiguna ninauca: Ciertu pacha Juan ima munanaita ricurinaras mana rarcachu, astaun tucui pai cai runamanda rimashcauna pactarinauca. 42 Ashca runauna chihui Jesuspi quirinauca.

Lázaro huañun

11:1 Chi horas shu Betania llactamanda runa, paihua l shuti Lázaro, ungushca aca. Cai llactai María paihua ñaña Martandi causaushca aca. 2 Cai María, ungushca Lázaro pañi, Señorda gusto asnaj ambihua armachij aca, Señorba chaquiras paihua acchahua chaquichica. 3 Paniuna Jesusma shimira cachanauca: Señor, nisha, can llaquishca runa ungushcami. 4 Jesús caita uyasha: Cai ungüi mana huañuchinachu, nica, astaun Diosta ahuyachingaj, Diospa Churi caimanda ahuyachishca tucungaj. 5 Jesús Martaras paihua ñañaras Lazaroras llaquicami. 6 Jesús Lázaro ungushcara uyasha, pai tiashcai ishqui punzha mas saquiricami. 7 Shinajpi, caimanda huasha, Jesús pai yachachishca runaunara: Acuichi, nica, cutillara Judea partima. 8 Yachachishca runaunaga: Yachachij, ninauca, sar punzhalla judioguna canda rumihua shitanara munanauca. ¿Cutu riunguichu chima. 9 Jesús cutipaca: ¿Manzhu caran punzha chungu ishqui horasta charin? Maicans punzhara purisha mana nijtangachu, cai pacha punzhara ricusha. 10 Randi, maicans tuta purisha nijtangami, punzha paihuajpi illashcamanda. 11 Caita rimashca huasha, Jesús nica: Ñucanchi llaquishca Lázaro amigo puñunmi. Puñushcamanda paita llicchachingaj riunimi. 12 Shinajpi yachachishca runauna: Señor, ninauca, pai puñujpi aliyangami. 13 Randi, Jesús casna rimasha, Lázaro huañushcara rimacami. Paigunaga samasha puñushcara Jesús riman nisha iyanauca. 14 Shinajpi Jesús pajllai, Lázaro huañushcami, nica. 15 Cangunamanda cushiyauni ñuca chihui illashcamanda, canguna quiringaj. Acuichi paihuajma. 16 Shinajpi Tomás, Chapa Huahua nishca, chishu yachachishca runaunama nica: Acuichi ñucanchis, paihua pariju huañungaj.

Jesús causarinami

17 Shinasha Jesús shamuca. Huañushca Lázarora ña chuscu punzha pambashcara tupaca. 18 Betania Jerusalen mayambi tiaca, shu samai purina tupui. 19 Ashca judioguna Martama Mariamas shamunaushca aca paigunara cushiyachingaj, Lázaro huañushcamanda. 20 Shinajpi Marta Jesús shamushcara uyasha, paita tupangaj llucshica. Maríaga huasii tiauca. 21 Marta Jesusta nica: Señor, can caibi tiaushca ajpiga ñuca turi mana huañunmachu aca. 22 Shinallara cuna ricsinimi imaras can Diosta mañajpi, Dios canda cungami. 23 Jesús: Camba turi causaringami, nica. 24 Marta: Yachanimi, nica, puchucaí punzha causarinaí pa. causaringami. 25 Jesús cutipasha nica: Ñucaga causarina mani, causáis ani. Maicans ñucajpi quirisha, huañushca ashallara, causaringami. 26 Tucui causajgunaga ñucajpi quirisha huiñaigama mana huañunaungachu. ¿Caita quiringuichu can? 27 Marta cutipaca: Shinai, Señor, nisha, can Cristo nishca Diospa Churi ajta, cai pachama shamujta, quirishcani.

Jesús huacaca Lázaro pambashcai

28 Marta casna rimasha pacalla rica paihua ñaña Mariara cayangaj. Paita nica: Yachachij caibimi, canda cayaun. 29 Maríaga caita uyasha, uctalla shayarisha paihuajma shamuca. 30 Jesús chara llactai mana icushcachu aca, astaun Marta paita tupashca pambai chapauca. 31 Shinajpi Mariahua parijsu huasii tiaj judioguna, paita cushiyachij shamujguna, pai ucta atarishcara llucshishcaras ricusha, paita catinauca: Aya huasima huacangaj riunmi, nisha. 32 Maríaga, Jesús tiashcara shamusha, paita ricusha, paihua chaquii tuama urmasha, paita nica: Señor, can caibi tiaushca ajpi, ñuca turi mana huañunmachu aca. 33 Shinajpi Jesús María huacashcara shinallara paihua parijsu shamuj judioguna huacashcaras ricusha, paihua shungüi yapa llaquirisha turbarica. 34 Jesús nica: Paita ¿maibi pambacanguichi? Señor, ninaun, ricuj shami. 35 Jesús huacacami. 36 Shinajpi judioguna ninauca: Ricuichi imasna Jesús paita llaquicami. 37 Paigunamanda huaquinguna ninauca: Cai ñausa ñahuirá pascaj ¿manzhu ushanmaca cai ruñara huañuimanda quishpichingaj?

Lázaro causarimun

38 Jesús cuti paihua shungüi llaquirisha, aya huasima shamuca. Peñas uctu aca. Shu rumi uctu pungu ahuai siriuca. 39 Jesús: Rumira anzhuchichi, nica. Martaga, huañu Lázaro pañi, nica: Señor, asnangami; ña chuscu punzha pambashcami. 40 Jesusga: ¿Manzhu canda nicani, can quirishallara, Dios sumaj munanaita rashcara ricunguimi? 41 Shinajpi huañushca runa siriushcamanda rumira anzhuchinauca. Jesús ahuama ricusha: Yaya, nica, can ñucara uyashcara agrasini. 42 Can tucui horas ñucara uyashcara yachacani. Randi cai ashca muyujta shayajgunamanda casna nicani, paiguna can ñucara cachamushcara quirinauchu. 43 Caita rimashca huasha, Jesús shinzhira caparisha: Lázaro, nica, pajllama llucshi. 44 Huañushca runaga llucshicami. Maquindi chaquindi Hachapahua huataushca, ñahuis llachapahua pillushca aca. Jesús nica: Huataushcara pascaichi, saquichi richu.

Jesusta huañuchingaj iyanaun

45 Shinajpi Mariajma shamuj judiogunamanda ashcauna Jesús rashcara ricusha, paihuajpi quirinauca. 46 Randi, huaquinguna fariseogunama rinauca Jesús rashcara paigunara cuentangaj. 47 Shinajpi sacerdote apuuna fariseogunandi parijsu tandarimusha ninauca: ¿Imara rashun? Cai runa munanaita ricurinaunara ashcara raun. 48 Ñucanchi paita casnalla saquijpi, tucui runauna paihuajpi quirinaungami. Romanosguna shamunaunga ñucanchi santo llactaras ailluunaras tulangaj. 49 Caifas, apuunamanda shuj, chi huatai sacerdoteuna atun apu asha, paigunara nica: Mana imaras yachanguichi; 50 shinallara mana iyanguichi imasnara ali tucunga shu runa ñucanchi entero aillu randimanda huañungaj, tucui runauna ama chingaringaj. 51 Caitaga mana pai quiquinmandalla rimaca, astaun pai chi huatai sacerdote atun apu asha, Diosmanda rimasha, Jesús entero aillu randimanda huañunami anga, nica. 52

Shinallara mana chi llacta aillumandalla huañuchu, astaun tucui Diospa chausirishca churiunara shujllai tandachingaj. 53 Shinasha, chi punzhamanda, paigunapura Jesusta huañuchingaj iyanaucami. 54 Shinajpi Jesús judiogunahua ña mana pajllai puricachu. Paiga runa illashca partí rayapura shu Efraín nishca llactama rica. Chihui pai yachachishca runaunahua saquirica. 55 Judioguna Pascua ista mayanllayauca. Chi llactamanda ashcauna Jerusalem sicanauca Pascua ista manara pactamujllaira maillaringaj. 56 Jesusta mascanauca. Templo huasii huaquinguna shujgunara tapunauca: ¿Jesús istama shamungachui? ¿Imasnara iyanguichiri? 57 Sacerdote apuuna fariseogunandi mandanauca: Maicans Jesús tiashcara yachasha rimanauchu, Jesusta apingaj, nisha.

María ambira talin Jesuspa chaquii

12:1 Pascua istamanda socta punzha ñaupá, Jesús Betaniama shamuca, huañuj Lázaro llactama, pai huañushcaunamanda causachishca. 2 Chihui Jesuspajta shu istara ranauca, tuta. Marta yanapaca. Lázaroga Jesushua pariju mesai tiarica. 3 Shinajpi María shu libra tupu gusto asnaj ambira apamuca; ashca valij aca. Chi ambihua Jesuspa chaquira armachica, shinallara paihua acchahua chaquira chaquichica. Ambi gusto asnaihua entero huasi undarica. 4 Judas Iscariote, Simomba churi, shu Jesús yachachishca runa, paita entregangarau, rimaca: 5 Cai ambi quinsa patsaj cullqui tupu valin, nica. ¿Imarasha mana catushca aca tsuntsuunama cungaj? 6 Casna rimaca, mana tsuntsuunara llaquishcamanda, astaun yachachishca runauna cullqui bolsara charisha, shuhuj asha, chimanda cullquira apij aca. 7 Shinajpi Jesús: Saqui, nica; ñuca pambarina punzahgama caita huacachishcami. 8 Tsuntsuuna tucui horas tianaunga, randi ñuca mana tucui horas cangunahua tiashachu.

Lazarora huañuchisha ninaun

9 Shinajpi judiogunamanda ashcauna Jesús chihui tiashcara uyanauca. Jesusmandalla mana shamunaucachu, astaun Lazarora ricungaj shamunaucami, pai huañushcamanda causarishcara ricungaj. 10 Sacerdote apuuna paigunapura rimananauca Lazarora huañuchingaj nisha. 11 Pai causarishcaraigumanda ashca judioguna anzhurinauca, Jesuspi quirinauca.

Jesús alabashca Jerusalembi icun

12 Cayandi punzha, ashca runauna istama shamujguna, Jesús Jerusalem shamungaraushcara uyasha, 13 ramos pangaunara apisha, paita tupangaj llucshinauca. Caparinauca: ¡Alabashca angui! nisha, ¡Señor Diospa shutii shamuj, Israel Rey Apu, bendiciashca achu! 14 Jesús shu malta burroro tupasha, paihua ahuai tiarica, cai Quillcashcasna: 15 Ama manzhaichu Siomba ushushi: Caiga, cambia Rey Apu malta burro ahuai tiarisha shamun. 16 Ñaupá punda cai tucuirá mana ali intindinaucachu pai yachachishca runauna. Astaun Jesusta sumacyachishca huasha,

cai tucuire paimanda quillcashca ajta iyarinauca, shinallara quillcashcasna runauna paita cai tucuire ranauca. 17 Jesushua pariju tiajguna Lazarora aya huasimanda cayaushcai, huañushcamanda causarishcais, pai rashcara cuentanauca. 18 Chimandas runauna paita tupangaj shamunauca, Jesús chi munanaita ricurinara uyashcamanda. 19 Astaun fariseoguna paigunapura ninauca: ¡Ricupaichi imasnara mana imaras ushanguichi. Entero mundu paita catinaun!

Griego runauna Jesusta mascanaun

20 Istama Diosta alabangaj shamujgunahua huaquin griego runauna tianauca. 21 Caiguna Filipema shamunauca. Cai Felipe Galilea partii tiaj Betsaida nishca llactamanda aca. Paiguna Felipera ruganauca: Señor, nisha, Jesusta ricunara munanchi. 22 Felipe caita Andresta cuentaca. Shinajpi Andrés Felipendi Jesusta cuentanauca. 23 Shinajpi Jesús cutipasha: Runa Churira sumacyachina horas pactamun, nica. 24 Cierta pacha cangunara nini: Trigo muyu allpai urmasha, mana huañusha sapalla saquirin. Randi, huañushaga, ashcara aparin. 25 Maicans paihua causaira llaquisha, causaira pirdingami. Randi, maicans cai pachai paihua causaira chijnisha, huiñaigama paihua causaira huacachingami. 26 Maicans ñucara sirvisha, catihuachu. Maibi ñuca tiaupi chillaira ñucara sirvij tiangami. Maican runa ñucara sirvisha, ñuca Yaya paita ahuayachingami.

Jesús pai huañungaraushcara riman

27 Cunallara ñuca alma turbarinmi. ¿Imara nishairi? ¿Yaya, cai horasmanda quishpichihuai, nishachu? Astaun, caita pactachingaj cai horasma shamucani. 28 Yaya, nica, cambia shutira ahuayachingui. Shinajpi ahua pachamanda shu shimi uyarica, nisha: Ahuayachishcani, cutillara ahuayachishami. 29 Chihui tiaj ashca runauna, shimira uyajguna: Rayuca, ninauca. Huaquingunaga: Shu ángel paita rimashcami, ninauca. 30 Jesús cutipasha: Cai shimi mana ñucajta, astaun cangunajta uyaricami, nica. 31 Cuna cai pacha taripanami. Cunallara cai pacha atun apu ichui tucungami. 32 Ñucaga allpamanda atarichishca ajpi, tucui runaunara ñucajma aisashami. 33 Jesús casna rimasha pai huañuna samillara intindichicami. 34 Runaunaga paita cutipanauca: Ley shimimanda uyashcanchi Cristo huiñaigama tiangami, nisha. ¿Imarasha ningui can Runa Churi atarinara ministinmi? ¿Pitai cai Runa Churi? 35 Shinajpi Jesús paigunara nica: Unallara punzha cangunahua tiangami. Purichi punzha tiaullaira, tuta cangunara ama cungaimanda apichu. Tutai purij maima riushcaras mana yachanzhu. 36 Imahoras punzhara charisha, punzhara quirichi, canguna punzhamanda churiuna tucungaj.

Judioguna mana quiriijguna

Caita rimaca Jesús. Casna rimashca huasha, paigunamanda chinganea. 37 Shinashas, Jesús runauna ñaupajpi ashca munanaita ricurinaunara rajllaira, mana

paita quirinaucachu; 38 Diosmanda rimaj Isafás rimashca pactaringaj imasna nin: Señor, ¿pita ñucanchi rimashcara quirishcachu? ¿Pima Diospa ushanara ricuchishcachu? 39 Chi raigumanda quirinara mana ushanaucachu, imasna Isafás shu partii nica: 40 Paiguna ñahuiunara ñausayachica, shinguras shinzhuyachica; ñahuihua ama ricunauchu, shunguhuas ama intindinauchu, ama ñucama voltiarinauchu, ñuca paigunara alichingaj. 41 Cai shimiunara Isafás rimaca, pai Diospa sumajta ricusha, Diosmanda rimashas. 42 Shinasha, apuunamanda ashcauna Jesuspi quirinauca; astaun fariseogunara manzhashcamanda paiguna quirishcara mana rimanaucachu, tandarina huasimanda ama ichui tucungaj. 43 Paiguna Dios alabashcamanda runauna alabashcara yali llaquinauca.

Jesús rimashca shimiuna runaunara taripanaun

44 Jesús caparisha nica: Maicans ñucajpi quirisha, mana ñucajllaira quirinzhu, astaun ñucara cachamujpis quirinmi. 45 Maicans ñucara ricusha, shinallara ñucara cachamujtas rican. 46 Ñucaga punzhayachij cai pachama shamushcani, tucui ñucajpi quirijguna ama tuta llandui tianauchu. 47 Maicans ñuca shimira uyajpi, mana pactachijpi, mana ñuca paita taripanichu. Cai pachara taripangaj mana shamucanichu, astaun cai pachara quishpichingaj. 48 Maicans ñucaras, ñuca shimiras mana chasquisha, paita taripangaj charin. Ñuca rimashca shimi paita taripangami puchucai punzhai. 49 Ñuca ñucamandallara mana rimacanichu; astaun ñucara cachamuj Yaya, paiga mandahuaca imara rimanaras. 50 Yachanimi Dios camachishca shimi huiñai causaimi. Ñuca imara rimashas, Yaya ñucama rimashcasna rimauni.

Jesús pai yachachishca runauna chaquira maulan

13:1 Pascua ista manara pactamujllaira, Jesús paihua horas ña pactamushcara ricsisha, cai pachamanda Yayajma ringaj, paihua cai pachai causajgunara llaquisha, puchucaigama paigunara llaquicami. 2 Tuta micunara micuushcai, supai apu Simomba churi Judas Iscariote shungüi iyachica Jesusta entregangaj. 3 Jesús yachaca paihua Yaya tucuiria paihua maquii churashcara, shinallara pai Diosmanda shamushcara, Diospajma rinaras yachaca. 4 Jesús micuna mesamanda atarisha, churanara anzhuchisha, chaquichina llachapara apisha chumbillica. 5 Shinajpi, shu batiai yacura talisha, pai yachachishca runauna chaquira maillangaj callarica, pai chumbillishca llachapahua chaquiunara chaquichica. 6 Jesús Simón Pedroma shamujpi, Pedro nica: Señor, ¿canzhu ñuca chaquira maillangui? 7 Jesús paita cutipasha: Ñuca raushcara mana intindinguichu cuna, nica, astaun huasha intindinguimi. 8 Pedroga: Mana imahoras chaquira maillahuangui ñucajta, nica. Jesusga: Nuca canda mana maillajpiga, mana imaras charinguichu ñucahua, nica. 9 Simón Pedro cutipasha: Señor, nica, mana chaquillara, astaun maquindis umandis maillahuai. 10 Jesús nica: Armashca runa chaquillara cuti maillangaj ministin, pai tucui pichashca tucungaj. Canguna pichashca anguichi, astaun mana tucui pichashcachu. 11 Jesús maican runa paita entregangaraushcara yachaca, chi raigumanda nica: Mana tucui pichashcachu. 12

Shinajpi, chaquiunara maillashca huasha, Jesús paihua churanara churarisha, cuti mesai tiarica. Jesús paigunara tapuca: ¿Yachanguichi ñuca cangunahua rashcara? 13 Canguna ñucara: Yachachij, Señor, nisha nianguichi. Shina nisha alimi rimanguichi. Shinami ani. 14 Ñucaga Señor, Yachachij asha, canguna chaquira maillashcani; shinallara cangunas shujguna chaquira maillana anguichi. 15 Ñuca shu ricuchinara cangunara ricuchishcani, ñuca rashcasna canguna shinallara ranguichi. 16 Cierto pacha cangunara nini: Sirvijga paihua patronmanda mana yalinzhu; shinallara cachashca runa paita cachajmanda mana yalinzhu. 17 Canguna cai camachishcaunara yachasha pactachishas, cushi shunguyuj anguichi. 18 Ñuca mana tucuimanda rimanichu. Ñuca ajllashca runaunara ricsinimi. Astaun, Diospa Quillca pactaringaj; Ñucahua pariju tandara micuj paihua chaquira atarichica ñucahua contra rasha. 19 Cunamanda pacha, manara pactarijllaira, cangunara rimashcani. Shina asha pactarishca horasllaira ñuca maican ajtas quiringuichi. 20 Cierto pacha cangunara nini: Maicans ñuca cachashca ruñara chasquisha, ñucaras chasquin. Maicans ñucara chasquisha ñucara cachamujtas chasquin.

Jesús paita entregangaraushcara riman

21 Caita rimashca huasha, Jesús paihua shungüi yapa llaquirica. Cierto pacha cangunara nini, cangunamanda shuj ñucara entregangami, nica. 22 Shinajpi yachachishca runauna parijumanda ricunanausha, paigunapura tapunauca: ¿Pitangái Jesús casna rimaushca? nisha. 23 Shu Jesús yachachishca runa, pai llaquishca, Jesuspa rayai quimirisha siriuca. 24 Simón Pedro, maquihua ricuchisha paita nica: Tapui, ¿pitairi pai casna rimaushca runa? 25 Paiga, Jesuspa pichu rayai quimirisha sirij: Señor, ¿pitairi? nica. 26 Jesús cutipasha: Ñuca ucuchishca tandara cushca runami, nica. Jesusga tandara ucuchisha, Simomba churi Judas Iscariotema cuca. 27 Judas ucushca tandara apishca huasha, Satanás supai apu paihua shungüi icuca. Shinajpi Jesús paita nica: Can rangaraushcara uctalla rai. 28 Jesús imamanda caita rimashcara mesai tiajguna mana intindinaucachu. 29 Huaquinguna iyanauca Judas cullqui bolsara charishcamanda, Jesús paita nica: Ñucanchi istai ministishcara randingui; mana shinasha imaras tsuntsuunama cuyangaj rimaca. 30 Ucushca tandara apishca huasha, Judas llucshica. Tuta aca.

Mushuj mandashca shimi

31 Pai llucshishca huasha, Jesús: Cuna Runa Churi sumacyachishcami, nica. Shinallara, Dios paihua Churu sumacyachishcami. 32 Diosga Churimanda sumacyachishca asha, shinallara Dios pai quiquinllai Churira sumacyachingami, cunallara paita sumacyachingami. 33 Churihuauna, chara ansa cangunahua pariju tiausha. Mascahuanguichi, randi imasnara judiogunara nicani: Ñuca riushcama canguna shamunara mana ushanguichichu. Shinallara cangunaras cuna nini. 34 Mushuj mandashca shimira cangunara rimauni: Parijumanda llaquinaanguichi. Ñuca cangunara llaquishcasna, shinallara parijumanda llaquinaanguichi. 35 Caimanda tucui

runauna canguna ñuca yachachishca runauna ajgunara ricsinaungami, canguna parijumanda llaquinausha.

Jesús nica: Pedro ichuhuangaraun

36 Simón Pedro Jesusta nica: Señor, ¿maimara ringui? Jesús cutipaca: Ñuca riushcama cuna mana ushangui carinara, astaun huashaga catihuanguimi. 37 Pedroga: ¿imamanda canda cunallara catinara mana ushachachu? nica. Can randimanda ñuca causaira cushami. 38 Jesús cutipaca: ¿Camba causaira ñuca randimanda cinguichu? Cierta pacha canda nini: Gallo manara cantajllaira, can quinsa cuti, Paita mana ricsinichu, ningui.

Jesús Yayajma riña ñambimi

14:1 Canguna shungu ama turbarichu. Diospi quiringuichi, ñucajpis quirichi. 2 Ñuca Yaya llactai ashca huasi tian. Mana shina ajpiga, cangunara rimaimacani. Ñuca canguna tianara alichingaj riunimi. 3 Rishaga, tianaunara alichisha, cuti shamushami cangunara ñucajma pushangaj, ñuca tiaushcai canguna shinallara chihui tiangaj. 4 Ñuca riushcara yachanguichi, shinallara nambiras. 5 Tomás paita nica: Señor, can riushcara mana yachanchi, ¿imasna rashara nambira ricsina angai? 6 Jesús paita nica: Ñuca ñambi ani, cierto shimi ani, causáis ani. Mana pihuas Yayama shamun, mana ñucahua shamusha. 7 Ñucara ricsisha, Yayaras ricsinguichima. Cunamanda paita ricsinguichi, paita ricushcanguichi. 8 Felipe paita nica: Señor, Yayara ricuchihuapai, chilla basta. 9 Jesús paita nica: ¿Ashca punzhaunara cangunahua pariju tiashcani, can ñucara mana ricsihuashcangui, Felipe? Maicans ñucara ricusha Yayaras ricushcami. ¿Imasnajpira shina ningui: Yayara ricuchihuapai? 10 ¿Ñucaga ñuca Yayajpi tiashcara, Yaya ñucajpis tiashcara manzhu quiringui? Ñuca cangunara rimashca shimiunara mana ñucamandallachu rimani, astaun ñucajpi causaj Yaya, paimi tucui ranaunara raun. 11 Ñucara quirihuaichi ñuca Yayajpi tiashcara, Yayas ñucajpis tiashcara; manashaga quiquin rashcaunamanda quirihanguichi. 12 Cierta pacha cangunara nini: Maicans ñucajpi quirisha, ñuca rashca samiunara shinallara rangami; caigunamanda yalijtas rangami, ñuca Yayajma rinamanda. 13 Canguna tucui imaras ñuca shutii Yayara mañajpi, cai tucuirashallami, Yaya Churimanda sumacyachishca angaj. 14 Canguna imaras ñuca shutii mañajpi, rashallami.

Santo Espiritura cusha nishca

15 Canguna ñucara llaquishaga, ñuca mandashca shimiunara pactachichi. 16 Ñuca Yayara rugasha, pai cangunara shu Yanapajta cachamungami huiñaigama cangunahua pariju tiangaj. 17 Cai Yanapaj cierto shimira rimaj Espiritumi. Cai pacha runauna paita chasquinara mana ushanaun, paita mana ricusha, mana ricsishas. Cangunaga paita ricsinguichi. Paiga cangunahua pariju tiaun, canguna shungu ucui tiangami. 18 Cangunaraga mana huaccha huahuaunara saquishachu. Cangunama

shamushami. 19 Unallara cai pacha runauna ñucara mana ricunaungachu. Astaun canguna ricuhuanguichimi. Nuca causashcaraigu cangunas causaunguichimi. 20 Chi punzhai ñuca Yayajpi tiashcara yachanguichi, cangunas ñucajpi, ñucas cangunajpi. 21 Maicans ñuca mandashca shimiunara charisha, pactachishas paimi ñucara llaquij. Ñucara llaquijta, ñuca Yaya paita llaquingami, ñucas paita llaquisha, ñucallara paima ricuchishami. 22 Judas, mana Iscariote, Jesusta nica: Señor, ¿Imarasha ñucanchillara ricuchingui, mana tucui cai pacha runaunaras? 23 Jesús paita cutipasha nica: Maicans ñucara llaquij, ñuca mandashca shimira pactachingami. Yayas paita llaquingami. Paihuajma shamushun, paihua causashun. 24 Maicans ñucara mana llaquij, ñuca shimira mana pactachinzhu. Canguna uyashca shimi mana ñucamandallarachu shamun, astaun ñucara cachamuj Yaya rimashcami. 25 Ñucas cangunahua pariju tiashallara cai shimiunara rimashcani. 26 Yaya ñuca shutii cachamushca Yanapajga, Santo Espíritu ashaga, cangunara tucui imaras yachachingami; shinallara tucui ñuca rimashcaunara cangunara iyarichingami. 27 Cushi shungura cangunara saquinimi; ñucamanda cushi shungura cangunara cuni. Mana cai pacha cushcasna cunichu. Canguna shungu ama turbarichu shinallara ama manzharichu. 28 Uyashcangui imasnara cangunara nicani: Riunimi, shinallara tigramunimi. Canguna ñucara llaquisha, cierto pacha cushiyanguichima, Yayajma riunimi nishcamanda, Yaya ñucamanda yali ashcaraigu. 29 Cuna, manara tucujllaira cangunara cuentashcani, imahoras casna tucujpi canguna quiringuichima. 30 Cunamanda mana ashcara cangunara rimashachu. Cai pacha atun apu shamun; paiga ñucajpi imaras mana charin. 31 Astaun cai pacha runauna Yayara ñuca llaquishcaras, Yaya ñucara mandashcaras ricsinauchu, shinallarami rauni. Atarichi, caimanda acuichi, nica.

[Jesús cierto uvillas yura](#)

15:1 Jesús nica: Ñuca cierto uvillas yura ani, ñuca Yayaga yurara cuirajmi. 2 Tucui pallca ñucamanda muyura mana aparijta pitinaunga; muyura aparijgunara pichanaunga astaun mas aparengaj. 3 Ñuca rimashca shimimanda canguna ña pichashca anguichi. 4 Ñucajpi tiaichi, ñucas cangunajpi. Imasnara pallca paulara mana aparengachu mana yurai tiajpi, shinallara canguna mana aparenguichichu mana ñucajpi tiajpi. 5 Ñuca uvillas yura ani, canguna pallcauna anguichi. Pihuas ñucajpi tiausha, ñucas paihuajpi, paiga ashca muyura aparengami. Ñucamanda anzhurishca asha, mana ima ranaras ushanguichichu. 6 Maicans mana ñucajpi tiausha, mana valij pallca cuenta ichui tucunga, chaquiringaj. Ichushca pallcaunara tandachinaunga, ninai shitasha rupachinaunga. 7 Canguna ñucajpi tiausha, ñuca shimiuna cangunajpi tiausha, imaras munasha mañaichi, cangunajta rashca anga. 8 Canguna ashca muyura aparijpi, ñuca Yaya sumacyachishca angami. Shinashas, canguna ñuca quiquin yachachishca runauna tucunguichimi. 9 Imasna Yaya ñucara llaquihuaca, shinallara ñuca cangunara llaquishcani. Ñuca llaquiushcai tiaichi. 10 Canguna ñuca mandashca shimiunara pactachijpi, ñuca llaquiushcai tiaunguichimi, imasna ñuca Yaya mandashca shimiunara pactachishcani, shinallara pai llaquiushcais tiauni. 11 Cai shimiunara cangunama rimashcani ñuca cushi cangunajpi tiachu, canguna cushi undajta angaj. 12 Caimi ñuca

mandashca shimi: Canguna parijumanda llaquinuichi, ñuca cangunara llaquishcasna. 13 Pi runas cai llaquinamanda yalira mana charinzhu, shu runa paihua causaira paihua amigouna randimanda cusha. 14 Canguna ñuca amigouna anguichi ñuca mandashcara rasha. 15 Cunaga, cangunara sirvijguna nisha mana rimashachu. Sirvijga paihua patrón rashcara mana yachanzhu. Astaun cangunara amigouna nisha rimashcani. Ñuca Yayamanda uyashcara, tucuire cangunara cuentashcani. 16 Canguna ñucara mana ajllahuashcanguichi, astaun ñuca cangunara ajllacani. Cangunara cachashcani aparisha ringaj, canguna aparishca saquirichu, canguna imaras Yayara mañajpi ñuca shutii cangunara cungami. 17 Caita cangunara mandani: Llaquinaanguichi parijumanda.

Mundu quirijgunara chijninga

18 Cai pacha runauna cangunara chijnisha, caita yachaichi, paiguna shinallara ñucara chijninauca cangunamanda ñaupara. 19 Canguna cai pachamanda asha, cai pacha runauna paiguna quiquimbajta llaquinaunma; astaun canguna mana cai pachamanda ashaga, chijni tucushcanguichi, ñuca cangunara cai pachamanda ajllashcaraigu. 20 Ñuca cangunara rimashca shimira iyaringuichi. Shu sirvij paihua patronmanda mana yalinzhu. Runauna ñucara tormendachihuanauca; shinallara cangunara tormendachinaungami. Paiguna ñuca rimashca shimira pactachisha, shinallara canguna rimashcara pactachinaungami. 21 Astaumbas, cai tucuire cangunara ranaunga ñuca shutimanda, ñucara cachamujta mana ricsishcamanda. 22 Ñuca mana shamushcapija, paigunama mana rimashcapijs, uchara mana charinaunmaca. Cuna paiguna rimanara mana ushanaun, Mana yachanchichu, nisha, paiguna ucharashcamanda. 23 Maicans ñucara chijnisha shinallara ñuca Yayaras chijnin. 24 Ñuca paiguna chaupi shungüi shujguna mana rashca tono ranaunara mana rashca ajpiga, paiguna uchara mana charinaunmaca. Cunaga ñucaras Yayaras ricunaushcami, chijninaushcami. 25 Cai casna tucushcami paiguna ley shimii quillcashca pactaringaj: Yangamanda ñucara chijnihuanauca, nisha. 26 Astaun Yayajmanda ñuca cachamushca Yanapaj, pai Yayajmanda llucshimuj, cierto rimaj Espíritu aj, pai shamushaga ñucamanda rimangami. 27 Cangunas shinallara ñucamanda rimanguichi, canguna callarimanda ñucahua parijs causashcamanda.

16:1 Cai tucuire cangunara rimashcani, canguna ama manzharingaj. 2 Tandarina huasiunamanda cangunara ichunaungami. Punzha shamunga imahoras maican runas cangunara huañuchisha, Diosta sirviunimi nisha iyangami. 3 Caita ranaungami Yayaras ñucaras mana ricsishcamanda. 4 Cai shimiunara cangunara rimashcani, horas pactamujpi, ñuca casna rimashcaunara iyarinauchu.

Santo Espíritu yachachinga

Callarimanda mana casna rimacani, ñuca cangunahua parijs tiashcamanda. 5 Cuna ñucara cachamujma riunimi. Cangunamanda pihuas mana tapuhuangui: ¿Maima

riungui? nisha. 6 Astaun ñuca casna rimashcamanda, canguna shungüi ashcara llaquiringuichi. 7 Cierta shimira rimauni: Ñuca ringaj ministirinmi, nisha. Ñuca mana rijpiga, Yanapaj cangunajma mana shamungachu. Ñuca risha, paita cachamushami. 8 Yanapaj shamusha, tucui runaunara ucharas, ali causanaras, taripanaras ricsichingami. 9 Uchamanda rimangami, runauna ñucajpi mana quirishcamanda. 10 Ali causanamanda rimangami, ñuca Yayajma riushcamanda; ñucara mana mas ricunguichichu. 11 Taripanamandas rimangami, cai pacha atun apu ña taripashcamanda. 12 Chara ashcara charini cangunara cuentangaj, astaun cunaliara uyanara mana ushanguichichu. 13 Imahoras cai cierta shimira rimaj Espíritu shamusha, pai cangunara tucui cierta rimashcara yachachingami. Pai quiquinmandallara mana rimangachu, astaun pai tucui uyashcara cuentangami, ima huasha horas shamunaras rimangami. 14 Pai ñucara sumacyachingami; ñucajmanda ajgunara cangunara rimangami. 15 Ñuca Yaya tucui charishca ñucajmi; chimanda nicani: Espíritu ñucajmanda apisha, cangunara yachachingami.

Canguna llaquirina cushi tucunga

16 Unallara mana ricuhuanguichichu, cuti unallai ricuhuanguichimi; ñuca Yayajma rishcamanda. 17 Shinajpi pai yachachishca runaunamanda huaquinguna ninauca: ¿Imara nin, Unallara ñucara mana ricuhuanguichichu, cuti unallai ricuhuanguichimi; shinallara Yayajma riunimi? 18 Paiguna ninauca: ¿Imara nin cai Unallai nishca? Pai rimashcara mana intindinchichu. 19 Jesusga paiguna tapusha nishcara ricsisha, paigunara nica: ¿Cangunapura tapunguichi cai ñuca rimashcara, Unallara mana ricuhuanguichichu, cuti unallai, ricuhuanguichimi nisha? 20 Cierta pacha cangunara nini: Huacangaraunguichi, llaquiringaraunguichi; astaun cai pacha runauna cushiyanaungami. Shinasha canguna llaqui tucujpi, canguna llaquirishca cushi tucungami. 21 Imahoras shu huarmi pagarichisha nanachinmi, paihua horas pactamushcamanda. Huahua pagarishca huasha, huarmi paihua nanaira ña cungarin, shu runa cai pachai pagarishcara cushiyashcamanda. 22 Shinallara canguna cierta pacha llaquiringuichimi. Shinasha ñuca cangunara cuti ricusha, canguna shungu cushiyangami. Canguna cushiyashcara pihuas mana quichungachu. 23 Chi punzhai imaras mana tapuhuanguichi. Cierta pacha cangunara nini: Tucui imaras Yayara mañajpi ñuca shutii, pai cungami. 24 Cuna horasgama imaras mana mañashcanguichi ñuca shutii. Mañaichi, cui tucunguichimi, canguna cushi pactaringaj.

Jesús nin, Mundura vencishcani

25 Cai tucuire yachachingaj cuentanaunahua cangunara rimashcani. Horas shamunga ñuca mana yachachingaj cuentanaunahua rimashachu, astaun pajllallai Yayamanda rimasha. 26 Chi punzhai ñuca shutii mañanguichi. Mana ninichu ñuca Yayara cangunamanda rugasha; 27 Yaya paulara cangunara llaquin, canguna llaquihuashcamanda, ñuca Diosmanda llucshishcara quirishcamandas. 28 Yayajmanda llucshicani, cai pachama shamucani. Cutillara cai pachara saquisha, Yayajma riunimi.

29 Pai yachachishca runauna ninauca: Cuna pajllai rimaungui, mana ima pacashca shimira rimaungui. 30 Cuna intindinchi can tucui imaras yachangu; pihuas canda imaras tapungaj mana ministingui. Caimanda can Diosmanda llucshishcara quirinchimi. 31 Jesús cutipaca: ¿Cunarachu quiringuichi? 32 Horas shamun, ña pactamun, nica, canguna chausiringuichimi, caran dueño paihua partima, ñucara sapalla saquianguichi. Astaun ñuca mana sapallachu ani, Yaya ñucahua pariju tiaunmi. 33 Cai tucuir cangunara rimashcani canguna ñucajpi cushira charinguichima. Cai pachai tormendosta charinguichimi, astaun quirichi, ñuca cai pachara vencishcanimi.

Jesús Diosta manan

17:1 Jesús cai tucuir rimaca. Ahuama ricusha, nica: Yaya, horas pactamun. Camba Churira sumacyachingui, camba Churi shinallara canda sumacyachichu. 2 Can paita ushairs cushcangu tucui runauna ahuai, tucui can paita cushca runaunama huiñai causaira cungaj. 3 Caimi huiñai causai, canda sapalla cierto Dios ajta, can cachamushca Jesucristoras ricsinauchu. 4 Ñuca cai pachai canda sumacyachishcani. Can ñuca rangaj cushcara pactachishcanimi. 5 Cuna, Yaya, ñucara sumacyachihuangui canhua pariju, ñuca ñaupá horas canhua pariju charishca sumajhua, cai pachara manara rashca ajllaira. 6 Can cai pachamanda cuhuashca runaunama camba shutira ricuchishcani. Cai runauna cambajguna anaucha, paigunara cuhuashcangu. Paiguna camba shimira pactachinaucha. 7 Cuna paiguna ricsinaushcami imasna tucui can ñucara cushcauna cambajmanda shamunaushcami. 8 Can ñucara rimashca shimiunara paigunara rimashcani. Paiguna cai shimiunara chasquinaushcami. Cierta pacha ñuca canmanda llucshishcara yachanaun, shinallara can ñucara cachamushcara quirinaushcami. 9 Paigunamanda rugauni. Cai pacha runaunamanda mana rugaunichu, astaun can ñucara cushca runaunamanda rugauni. Paiguna cambajguna anaun. 10 Tucui ñucaj cambajmi, shinallara cambaj ñucajmi. Paigunamanda sumacyachishca ani. 11 Cunamanda cai pachai mana tiaunichu; caiguna cai pachai tianaunmi. Ñucaga cambajma shamuni. Sumaj Yaya, caigunara, can ñucama cushca runaunara, huacachipai camba shutii, paiguna shujlla anaucha ñucanchisna. 12 Cai pachai ñuca paigunahua pariju tiaushcai, camba shutii paigunara huacachicani. Can ñucama cushca runaunara huacachishcani, paigunamanda pihuas mana pirdiricachu; randi pirdirina aj runa, pailla pirdirica, Quillcashca pactaringaj. 13 Cunaga cambajma shamuni. Caita cai pachai rimauni, paiguna ñuca cushira pactajta charinauchu paiguna shungüi. 14 Can rimashca shimira paigunara rimashcani. Cai pacha runauna paigunara chijninaucami, paiguna mana cai pachamanda ashcaraigu, imasna ñucas shinallara mana cai pachamandachu ani. 15 Can paigunara cai pachamanda llucchingaj mana ruganichu, astaun can paigunara manalimanda huacachichu. 16 Paiguna mana cai pachamandachu anaun, imasna ñucas mana cai pachamandachu ani. 17 Paigunara chicanyachi camba cierto shimii. Can rimashca shimi ciertomi. 18 Imasna ñucara cai pachama cachamucangu, shinallara ñuca paigunara cai pachama cachamushcani. 19 Paigunara llaquishcamanda ñuca ñucallara mundumanda chicanyachiuni, paiguna shinallara cierto shimii chicanyachishca

anauchu. 20 Mana caigunamandallachu mañauni, astaun shinallara paiguna rimashcamanda ñucajpi quiringaraujgunamandas, 21 paigunapura shujlla anauchu, imasna can Yaya ñucajpi, ñucas cambajpis, shinallara paigunas ñucanchijpis shujlla anauchu, cai pacha runauna can ñucara cachamushcara quirinauchu. 22 Nuca can cuhuashca sumajta paigunama cushcani, paigunapura shujlla anauchu, ñucanchi imasna shujlla ashcasna; 23 ñuca paigunajpis, can ñucajpis, paiguna ali pacha shujlla anauchu; cai pacha runauna can ñucara cachamushcara yachanauchu, shinallara can paigunara llaquishcara ricsinauchu, imasna can ñucara llaquishcasna. 24 Yaya, can cuhuashca runauna ñuca munani maibi ñuca tiashcais paigunas ñucahua pariju tianauchu, can ñucara cushca sumajta ricungaj. Can cai pachara manara rajllaira ñucara llaquihuashcangui. 25 Ali Yaya, cai pacha runauna canda mana ricsinaushcachu, astaun ñuca canda ricsishcani. Caigunas can ñucara cachamushcara ricsinaushcami. 26 Shinallara ñuca cambia shutira paigunama ricsichishcani, charajpas ricsichisha, can ñucara llaquishca sami llaquina paigunajpi tiachu, ñucas paigunajpi tiachu.

Soldarouna Jesúsía apinaun

18:1 Jesús cai tucuirá rimashca huasha, pai yachachishca runaunahua pariju llucshica, Cedro nishca yacu chimbama, shu sisa pambama. Chihui icuca pai yachachishca runaunahua. 2 Judaspas, Jesusta entregaj runa, cai sisa pambara ricsica. Ashca cuti Jesús pai yachachishca runaunandi chihui tandarijguna aca. 3 Judas, shu montón soldarounara apisha, sacerdote apuunamanda fariseogunamandas cachashca guardaunandi, chi pambama rinauca, velaunahua nina huanguunahuas esparaunahuas. 4 Jesusga tucui ima tucungaraushcaras yachasha, ñaupasha rica: Pita mascaunguichi, nica. 5 Nazaretmanda Jesusta mascaunchi, ninauca. Jesusga: Ñuca mani, nica. Paigunahua, Judas, Jesusta entregaj runa, chillaira tiauca. 6 Jesús paigunara, Ñuca mani, nijpi, runauna huashama tigrasha allpama urmanauca. 7 Cuti Jesús: ¿Pita mascaunguichi? tapuca. Paiguna, Nazaretmanda Jesusta, ninauca. 8 Jesús cutipasha nica: Ña nicani, Ñuca mani. Canguna ñucara mascasha, caigunara ringaj saquichi, nica. 9 Casna tucuca pai rimashca shimi pactaringaj: Can ñucara cushca runaunamanda pitas mana pirdishcani, nisha. 10 Shinajpi Simón Pedro, esparara charisha, llucchica, sacerdote atun apura sirvijta chugrichica, paihua ali rinri carara pitisha. Cai sirvij Maleo nishca shutiyuj aca. 11 Shinajpi Jesús Pedrora nica: Esparara carai sati. ¿Ñuca Yaya cushca tormendarina vasora manzhu upisha?

Jesús gobierno ñaupajpi

12 Shinajpi soldare montón paiguna capitandi judioguna cachashcaunandi Jesusta apinauca, huaschahua paita huatanauca. 13 Ñaupá punda Jesusta Anas nishcama pushanauca, pai Caifas nishca huarmi yaya asha, Caifas chi huatai sacerdoteuna atun apu aca. 14 Chi Caifas judiogunama rimaj aca: Shu runa tucui runauna randimanda huañuna ministirin, nisha.

Pedro Anaspa patioi

15 Simón Pedro, shu yachachishca runandi Jesusta catinauca. Chishu yachachishca runa sacerdote atun apu ricsishca aca. Pai Jesushua pariju sacerdote atun apu huasi pungid icuca. 16 Astaun Pedro pungu pajllama tiauca. Shinasha chi yachachishca runa, sacerdote atun apu ricsishca asha, pungid ricuj huarmira rimaca, Pedrora ucuma icuchica. 17 Shinajpi pungura cuiraj huarmi Pedrora nica: ¿Manzhu can cai runa yachachishca runaunamanda angui? Pedro cutipasha: Mana, nica. 18 Sirvijguna guardaunandi shayarisha ninara tandachinauca. Chiri tucushcamanda cunurianauca. Paigunahua pariju Pedro shayarica cunungaj.

Anas Jesusta tapun

19 Sacerdote atun apu Jesusta tapuca pai yachachishca runaunamanda, pai camachishcaras. 20 Jesús paita: Ñucaga pajllai runaunara rimashcani, nica. Tucui horas tandarina huasii yachachishcani, templo huasiis, tucui judioguna tandarinaunais yachachishcani. Pacalla imaras mana rimashcanichu. 21 ¿Imarasha tapuhuangui ñucara? Uyajunara tapui imara paigunara rimashcani. Paiguna ñuca rimashcara yachanaun. 22 Jesús casna rimajpi, shu chihui tiaj guarda Jesusta sajmaca, nisha: ¿Shinachu sacerdote atun apura cutipangui? 23 Jesús cutipaca: Ima manaliras rimashca ajpi, manalira ricuchihuai. Mana shinasha, ¿imamanda sajmahuangui? 24 Shinajpi Anas huatashca Jesusta Caifas sacerdote atun apujma cachaca.

Pedro Jesusta mana ricsinichu nin

25 Shinajpi Pedro shayarisha cunuuca. Paita ninauca: ¿Manzhu can pai yachachishca runaunamanda angui? Pedroga, Mana, nica. 26 Sacerdote atun apura sirvijgunamanda shuj, rinri chugrichishca runa aillu, paita nica: ¿Manzhu canda ricucani sisa pambai, Jesushua pariju? 27 Cuti Pedro: Paita mana ricsinichu, nica. Chi ratollaira gallo cantaca.

Jesús Pilato ñaupajpi

28 Tutamanda Jesusta Caifaspajmanda taripana huasima pushanauca. Paigunaga taripana huasii mana icunaucachu, shujgunahua ama llutarisha huajliringaj, shina rasha Pascua istara micunara ushangaj. 29 Shinajpi Pilato canzhama llucshimuca, paigunama. ¿Imamanda causayachinguichi cai ruñara? nica. 30 Cutipasha, ninauca: Cai runa mana causayuj ajpi, cambajma mana pushamunchimachu aca. 31 Shinajpi Pilato paigunara nica: Cangunalla paita pushaichi, canguna yachaira paita taripaichi. Judioguna paita: Ñucanchiga pitas mana huañuchinara ushanchichu, ninauca. 32 Caita ninauca Jesús rimashca shimi pactaringaj, imahoras pai ima sami huañuihua huañunara rimaca. 33 Shinasha Pilato cuti taripana huasii icuca. Jesusta cayasha tapuca: ¿Can judioguna rey apuchu angui? nisha. 34 Jesús paita cutipaca: Caitaga,

¿camba quiquin iyaimanda rimanguichu, manasha shujgunachu ñucamanda rimanauca? 35 Pilato cutipaca: ¿Ñucaga judiochu ani? Camba llactapurauna sacerdote apuunandi canda ñucama entreganaushca. ¿Imara rashcangui? 36 Jesús cutipaca: Ñuca mandana pacha mana cai pachamandachu. Cai pachamanda ajpiga, ñucara sirvijguna macananaunmami, ñuca judiogunama ama cui tucungaj. Astaun ñuca mandana pacha mana caimandachu. 37 Shinajpi Pilato paita nica: ¿Shinasha can rey apuchu angui? Jesús cutipaca: Can rey apu angui nisha nihuangui. Chiraigumanda pagaricani; chiraigumanda cai pachama shamucani, cierto shimira rimangaj. Tucui cierto shimira chasquij ñuca shimira uyanmi. 38 Pilato paita: ¿Cierta shimiga, imarai? nica. Caita rimashca huasha, Pilato cuti judiogunama llucshisha, paigunara: Ima causaras paihuajpi mana tupanichu, nica. 39 Canguna yachaira charinguichi, Pascua istai ñuca cangunama shu ruñara cacharingaj. Shinasha, ¿ñuca cai judioguna Rey Apura cacharingaj munanguichi? 40 Shinajpi tucui pariju caparinauca: Caitaga mana, nisha, astaun Barrabasta munanchi. Barrabasga shuhuj runa aca.

19:1 Shinajpi Pilato Jesusta apisha, paita azutica. 2 Soldarounaga casha llaitura ahuanauca, Jesuspa umai churachinauca. Paita puca llachapahua churachinauca. 3 ¡Alabashcangui, ninauca, judioguna Rey Apu! Shina nisha paita sajmanauca. 4 Shinajpi Pilato cuti canzhama llucshisha, judiogunara nica: Ricuichi, paita llucchimuni canguna yachangaj, ñuca mana ima causaras tupanichu paihuajpi. 5 Jesús canzhama llucshisha, casha llaitu paihua umai, puca llachapahua churarishca. Pilato paigunara nica: ¡Ricuichi cai ruñara! 6 Sacerdote apuuna guardaunandi Jesusta ricusha caparinauca: Chacatai, chacatai, nisha. Pilátoga paigunara nica: Cangunalla paita pushaichi, chacataichi. Ñucaga ima causaras paihuajpi mana tupanichu. 7 Judioguna cutipanauca: Ley shimira charinchi; ñucanchi ley shimimanda pai huañuna anga, Diospa Churi ani, nishcamanda. 8 Pilato caita uyasha maspas manzharicami. 9 Cuti taripana huasii icusha, Pilato Jesusta: ¿Maimandara angui can? nisha tapuca. Jesús mana imaras cutipaca. 10 Shinajpi Pilato paita: ¿Imarasha mana cutipahuangui? nica. ¿Manzhu yachangui canda chacatangaj ushaira charini, shinallara canda cacharinaras ushaira charini? 11 Jesús cutipaca: Ñucahua mana ima ushairs charinguima, mana ahua pachamanda cushcapi. Chimanda ñucara canda cuj runa yali uchayujmi. 12 Caimanda Pilato Jesusta cacharingaj iyarica. Judiogunaga astaun caparisha: Can cai ruñara cacharisha, mana Cesarba amigochu angui, ninauca. Maicans paulara rey apu tucusha Cesarda chijnin. 13 Shinajpi Pilato cai shimira uyasha, Jesusta canzhama pushaca. Taripanai tiarica, Rumi Pata nishca pistui; caita hebreo shimii Gabata nishcami. 14 Pascua ista alichina punzha aca, doce horas chaupi punzha mayan. Shinajpi Pilato nica: ¡Ricuichi canguna Rey Apura! 15 Paiguna caparisha: ¡Llucchi, llucchi, paita chacatai! ninauca. Pilatoga: ¿Canguna Rey Apura chacatashachu? nica. Shinajpi sacerdote apuuna: Cesarlla ñucanchi rey apumi, shujpas illanmi, ninauca. 16 Shinasha Pilato Jesusta paigunama entregaca chacatangaj. Paiguna Jesusta apisha pushanaucami.

[Jesús chacatashca huañun](#)

17 Jesús paihua cruzta aparisha ricami, Uma Tullu nishca pambama, caita hebreo shimii, Gólgota nishcami. 18 Chihui Jesusta chacatanauca. Painsi ishquiras, ali maquima shujta, Ilaquima shujta, Jesús paiguna chaupi shungüi. 19 Pilato shu quillcara quillcaca, cruz ahuai churacami. Shinami quillcashca aca: Nazaretmanda Jesús, judioguna Rey Apu. 20 Ashca judioguna cai quillcashcara ricunauca; Jesús chacatashca pamba entero llacta mayambi ashcamanda. Chi quillcashca hebreo, griego, latin shimiunai quillcashca aca. 21 Judioguna sacerdote apuuna Pilator ninauca: Judioguna Rey Apu ama quillcangui, randi: Judioguna Rey Apu mani, nica; shinara quillcai. 22 Shinajpi Pilato cutipaca: Ñuca ña quillcashcaga quillcashcami. 23 Soldarouna Jesusta chacatashca huasha, paihua churanaunara apisha chuscu partii chaupinauca, caran soldaro shu partirá charingaj. Paihua ucu churarina sirana illaj aca, ahuamanda shujllai ahuashca aca. 24 Paigunapura ninauca: Ama lliquishunchi caita. Astaun ajllashunchi pihujchu anga; maican lichayuj asha apachu. Shina rasha, quillcashcara pactachinauca, cai: Paigunapura ñuca churanara chaupinauca, ñuca llachapamanda maican lichayujta ajllanauca, nisha. Soldarouna shina ranauca. 25 Jesuspa cruz rayai, paihua mama, paihua mama ñaña, Cleofaspa huarmi Marías, María Magdalenas chihui pariju tianauca. 26 Jesús paihua mamara ricusha, pai llaquishca yachachishca ruñaras chihui tiajtas ricusha, Jesús paihua mamara nica: Huarmi, riqui camba churira. 27 Chi huasha Jesús cai yachachishca ruñara nica: Riqui camba mamara. Chimanda pacha cai yachachishca runa Jesuspa mamara paihua quiquin huasima pushaca. 28 Chimanda huasha, Jesús tucuir ña pactarishcara yachasha, Quillcara pactachingaj: Upinai, nica. 29 Chihui shu ayac vinohua undachishca vaso tiaca. Shinajpi shu pútusta tsungachinauca vinohua; caspi pundai huatasha, Jesuspa shimii llutanauca. 30 Jesús vinora upishca huasha: Ña pactarishcami, nica. Shina nisha, umara uraima lapusha, espiritara entregacami.

Jesusta lanzahua tucsishca

31 Shinajpi judioguna Pascua alichina punzha asha, samana punzhai huañushcauna cruzpi ama saquirinauchu, chi samana punzha atun ista punzha asha, Pilator mañanauca paiguna changa tulluunara paquinauchu, paigunara cruzmanda anzhuchinauchu. 32 Soldarouna shamujpi, changaunara paquinauca shu ruñara chishu ruñaras, Jesushua pariju chacatashcaunara. 33 Shinajpi Jesusma shamusha, pai ña huañushcara ricusha, paihua changara mana paquinaucachu. 34 Astaumbas shu soldaro Jesusta costillaspi tucsica lanzahua. Chimanda yahuarndi yacundi llucshinauca. 35 Chita ricuj runa riman. Pai rimashca shimi ciertomi. Pai rimashca shimi cierto ashcara paimi yachan, canguna shinallara quirinauchu. 36 Cai tucuir rashca aca Quillcashca pactaringaj, shina nisha: Paimanda ima tulluras mana paquishcachu anga. 37 Shinallara shu Quillcashcai: Paiguna tucshishca ruñara ricunaungami, nin.

Jesusta pambashca

38 Chimanda huasha, Arimatea llactamanda José, pai Jesús yachachishca runa asha,

astaun pacallami judiogunara manzhashcaraigu, Pilatera mañaca: Lugarda cuhuai, nisha, Jesuspa aichara cruzmanda llucchingaj. Pilato lugarda cucami. Shinajpi José shamuca, Jesuspa aichara llucchicami. 39 Shinallara shamuca Nicodemo, pai ñaupá Jesusma tutai shamuj, mirrahua, aloehua masashca gusto asnaj ambira apamusha, patsac libra tupura. 40 Jesuspa aichara apinauca, llachapahua pillunauca gusto asnajgunahua, judioguna pambana yachaira. 41 Jesús chacatashca pamba mayambi shu sisa pamba tiaca. Sisa pambai shu mushuj pambana uctu tiaca, chihui pitas chara mana pambashcachu aca. 42 Pascua alichina punzha ashcamanda, chi pambana uctu mayanlla ajpi, chillai Jesusta chingachinauca.

Jesús causarimun

20:1 Semana callarina punzhai, tuta ucura, chara llandu ashcai, María Magdalena Jesús pambashcama shamuca. Rumi anzhuchishcara ricuca. 2 Shinajpi María callpasha rica Simón Pedroma, chishu yachachishca runamas, pai Jesús llaquishcara. Paigunara nica: Pambashcamanda Señorda apanaushca. llanmi. Maibi churashcaras mana yachanchichu. 3 Pedro, chishu yachachishca runandi llucshisha, pambashcama rinauca. 4 Cai ishqui runa pariju callpanauca. Chishujga Pedromanda yali uctalla callpaca, ñaupalla pambashcama pactaca. 5 Cumurisha ricungaj llachapaunara sirijta ricuca. Shinashas mana icucachu. 6 Huasha, Simón Pedro paita catisha pactamuca; pambashca uctui icusha siriu llachapaunara ricuca. 7 Shinallara umai pillushca llachapara ricuca, mana chishu llachapaunahua pariju, astaun shujpi pillushca aca. 8 Shinajpi chishu yachachishca runa, chi ñaupá pactamuj pambashcama, pais shinallara icuca. Ricusha quiricami. 9 Paiguna Quillcashcai quillcashcara Jesús huañushcaunamanda causarinara chara mana intindinaucachu. 10 Yachachishca runauna paiguna huasima tigranauca.

María Magdalena Jesusta ricun

11 Astaun María pambashca canzhai huacasha tiauca; huacashallara pambashcara ricungaj cumurica. 12 Ishqui angelda ricuca, yurajta churarishcaunara. Shuj umama, shujtas chaquima Jesús sirishcai tianauca. 13 Angelguna paita: Huarmi, ninauca, ¿imaranda huacaunguiri? Maríaga: Ñuca Señorda apashcamanda, nica. Maibi paita churashcaras mana yachanchichu. 14 Shina rimasha, María huashama voltiarisha, Jesús chihui shayauta ricuca. Paita Jesús ajtara mana ricsicachu. 15 Jesús paita: Huarmi, nica, ¿imarasha huacaunguiri? ¿Pita mascaunguiri? Maríaga, sisa pambara cuirajmi iyasha, nica: Señor, can paita apashca ajpiga, maibi churashcangui cuentahuai. Ñuca paita apasha. 16 Jesusga: ¡María! nica. Paiga voltiarisha ricusha: ¡Raboni! nica. Caimi, Yachachij, nin. 17 Jesús paita nica: Ama llangahuaichu. Chara Yayajma mana sicashcanichu. Ñuca uquiunama ri; paigunara rimairi: Ñuca Yayajma, canguna Yayajmas, ñuca Diosma, canguna Diosmas sicauni, nica. 18 María Magdalena rica yachachishca runaunama cuentangaj imasna Señorda ricushcaras, pai rimashcaras.

Yachachishca runauna Jesusta ricunaun

19 Chi quiquin punzha, ña chishiyaupi, semana callarina punzha asha, yachachishca runauna tandarinauca. Paiguna tandariushcai pungu ishcashca aca, judiogunara manzhashcamanda. Jesús shamusha, paiguna chaupi shungüi shayarisha, paigunara: Cushiyaichi, nica. 20 Caita rimashca huasha, Jesús paihua maquira paihua costillastas ricuchica. Yachachishca runauna Señorda ricusha cushiyanaucami. 21 Shinajpi Jesús paigunara nica: Cushiyaichi. Yaya ñucara cachashcasna, shinallara cangunara cachauni. 22 Casna rimashca huasha, Jesús paiguna ahuara samaca, nisha: Santo Espiritura apichi. 23 Maicanma ucharashcaunara llushpichisha, llushpichishca anaunmi. Maicanmas ucharashcaunara saquichisha, saquichishca anaunmi.

Tomás mana quirinzhu

24 Tomasga, chungu ishquimanda shuj, Chapa Huahua nishca, Jesús shamushcai illacami. 25 Chishu yachachishca runauna paita ninauca: Señorda ricushcanchi. Tomás cutipaca: Paihua maqui clavashca uctuunara mana ricusha, ñuca rerora clavo uctuunai mana satisha, ñuca maquiras costillaspi mana satisha, mana quirishachu. 26 Pusac punzha huasha, cutillara yachachishca runauna ucui tianauca, Tomás paigunahua tiauca. Jesús icuca, pungu ishcashca asha. Paiguna chaupi shungüi shayarisha: Cushiyaichi, nica. 27 Shinajpi Jesús Tomásta: Rerora apami, nica, ñuca maquiunara riqui, nica. Caima maquira chutachi, costillaspi sati. Ama mana quirij tucui, astaun quirij tucui. 28 Tomás cutipaca: Ñuca Señor, ñuca Dios, nisha. 29 Jesús paita: Can, Tomás, ricushcamandalla quirishcangui. Astaun mana ricusha quirijguna bendiciashca anaungami.

Canguna quiringaj quillcashcami

30 Jesús shinallara ashca munanaita ricurinaunara rarcami pai yachachishca runauna ñaupajpi, chiguna cai quillcai mana quillcashcachu tian. 31 Caigunara quillcashcami Cristo Diospa Churi ashcara quiringaj, canguna quirisha causaira charingaj paihua shutii.

Jesús ricurin Galilea lamar rayai

21:1 Chimanda huasha, Jesús cuti pai yachachishca runaunama ricurimuca Tiberias nishca lamar patai. Cai samii ricurica. 2 Simón Pedro, Chapa Huahua nishca Tomás, Galileai Canámanda Natanael, Zebedeo churiuna, shu ishqui Jesús yachachishca runaunandi pariju tianauca. 3 Simón paigunara nica: Licangaj riuni. Chishujguna: Canhua catimunchi, ninauca. Risha, canoai icunauca. Tuta pagarijta imaras mana apinaucachu. 4 Punzhayaushcai, Jesús pulayai shayarica. Yachachishca runaunaga pai Jesús ajta mana ricsinaucachu. 5 Jesús: Churihuauna, nica, ¿imahuaras micunara

charinguichi? Illan, ninauca. 6 Paigunara nica: Licara ali maqui partima shitai, tupanguichimi. Shinajpi licara shitasha, ashca aichahua apirica. Licara mana imasna rashas llucchihua aca, ashca aichahua tiashcamanda. 7 Shinajpi chi Jesús llaquishca yachachishca runa Pedrora nica: Señormi. Simón Pedro, Señor ajta uyasha, churanara churarisha chumbillica, llatan ashcamanda; chasna rasha yacuma pahuaca. 8 Chishu yachachishca runauna canoandi shamunauca, licara aisasha, paiguna yacu patamanda mana yapa carui anaUCA, patsaj metro tupullai. 9 Allpama pactamujpiga, ninara apichishcara, nina ahuai aichahua churashcaras ricunaUCA, tandandi. 10 Jesús paigunara nica: Cuna apishca aichahuamanda apamichi. 11 Simón Pedro sicaca, licara pulayama aisamusha. atun aichahuahua undashca aca, shu patsaj pichca chungu quinsa ashca. Shina tupu ashas, lica mana lliquiricachu. 12 Jesús paigunara: Micuj shamichi, nica. Pihuas paita tapuñara mana ushanaucachu: Canga ¿pitangui? nisha, pai Señor ashcara riparasha. 13 Shinajpi Jesús shamujpi, tandara apisha paigunara cuca, shinallara aichahuaras. 14 Caita ña quinsa cuti Jesús pai yachachishca runaunama ricurimuca pai causarishca huasha.

Ñuca borregounara carai

15 Micushca huasha, Jesús Simón Pedrora nica: Simón, Jonaspa churi, ¿caigunamanda yali ashcara llaquihuanguichu? Pedro cutipaca: Ari, nisha, can yachangui, Señor, ñuca canda llaquinimi. Jesús paita: Ñuca borrego huahuaunara carangui, nica. 16 Ishqui cuti Jesús paita: Simón, Jonaspa churi, ¿ashcara llaquihuanguichu? nica. Ari, nica, can yachangui, Señor, ñuca canda llaquinimi. Jesús paita: Ñuca borregounara carangui, nica. 17 Jesús quinsa cuti tapusha: Simón, Jonaspa churi, nica, ¿llaquihuanguichu can? Pedroga, Jesús quinsa cuti tapushcai: Llaquihuanguichu, nishcamanda llaquiricami. Cutipaca: Señor, nisha, tucuire yachangui; ñuca canda llaquishcara yachangui. Jesús paita: Ñuca borregounara carangui, nica. 18 Ciertu pacha canda nini: Malta ashcai, canlla churaringami; maima munashcamas purij acangui. Randi, can rucu tucushcai, maquiunara chutachingui, shujga canda churachingami, can mana munashcama canda pushanaungami. 19 Caita nica Jesús, Pedro imahuara huañungarauca, Diosta sumacyachingaj. Shina rimasha, Catihuai, nica.

Llaquishca runamanda riman

20 Pedro voltiarisha, Jesús llaquishca yachachishca ruñara catimujta ricuca. Caiga Jesuspa rayai quimirisha sirij aca tuta micushcai, Jesusta tapusha: Señor, ¿pimi canda huañuchingaj entregangachu? nisha. 21 Pedro paita ricusha Jesusta nica: Señor, ¿cai runaga imara? 22 Jesús: Ñuca cuti tigramungagama pai tiauchu munasha, ¿canda imara? nica. Canga, catihuai. 23 Shinasha uquiunapura cai shimi mirarica, cai yachachishca runa mana huañunachu, nisha. Astaun Jesús mana nicachu: Mana huañunachu, randi shina nicami: Cai runa ñuca cuti tigramungagama tiauchu ñuca munasha, ¿canda imara? 24 Caimi cai tucuire rimaj yachachishca runa. Cai tucuire

quillcacami. Pai rimashcauna cierto ajta yachanchi. 25 Shinallara Jesús rashcauna shujguna ashcara tianaun; caranda chican chican quillcajpiga, entero cai pacha mana pactanmachu aca quillcashca librounara charingaj yachin. Amen.